

## MÃ'AK TE TOPA YÕG HÃM'ÃPAK MAX 'ÃKTUX

*Yoãm tep-tox pix, tu hãm'ãktux*

<sup>1</sup> Nũhũ', yã Yeyox Kunnix yõg hãm'ãpak max'ax, yã Topak-tok yõg.

<sup>2</sup> Hõmã 'ũhittap 'Iyait te Topa pupi hãm'ãktux, hu Yeyox Kunnix yõg hãm'ãpak max'ax 'ãktux, hu nõ kax'ãmix tappet tu, hu:

“Topa te: 'Ãte tik mõkutnãp-tup, puyĩy 'ũg pupi hãm'ãktux, puyĩy 'ãkeppa mõg, puyĩy xa hãmmaxnã'.

<sup>3</sup> Tute hãm'ãktux ka'ok putup hãm panip xexka tu', hu hãm'ãktux, hu: Yũmũg xuxyã nũn putup. 'Ãpu yã tu hãmmaxnã'. 'Ãpu yã hãmma mĩy.” Kaxĩy.

<sup>4</sup> Hãpxip 'ĩhã' nũn Yoãm, nõm tep-tox pix. 'Ûnũn, tu nõktu' xupep hãm panip xexka tu', tu tikmũ'ũn putox pix, tu hãm'ãktux, hu:

—'Ãpu yã yãyhãhup, nũy hãpkummuk mĩy kux, ha 'ãte 'ãp-tox pix putup, puyĩy Topa 'ãxop yõg hãpkummuk mĩy'ax xaxogã', pu tu' kux. Kaxĩy.

<sup>5</sup> Ha ta' nũn hãpxexka Yonex yõg tikmũ'ũn xohix xix kõmẽn Yenoyanẽn yõg tikmũ'ũn xohix, nũy Yoãm yõg hãm'ãktux 'ãpax. 'Ûnũn xohix, nõktu' mõxaha', tu Yoãm yõg hãm'ãktux 'ãpak, tu yã yõg hãpkummuk mĩy'ax 'ãktux, ha Yoãm tep-tox pix kõnãg kox Yohnãm kopah.

<sup>6</sup> Yoãm te' tat topixxax, yã kãmẽn xe hã' mĩy, tu xokxax hãg-nã y hĩy, tu kunit mãhã', tu puk hep xup.

<sup>7</sup> Yoām te:

—Hāpxip 'īhā' nōy tek pe' nūn putup. Yā' ka'ok nō'ōm, ha tak pu'uk. 'Ūxexka xop te' yōg pataxax ko'a, pu' max, pak pu'uk, hu yōg pataxax ko'a, pu' kummuk.

<sup>8</sup> 'Āte 'āp-tox pix kōnāg hā, pa tute 'āxop ha Topa Koxuk nū'kutnāp-tup, nūy 'āxop ka'ogā'. Kaxīy.

*Yoām te Yeyox putox pix*

<sup>9</sup> Ha ta' xip Yeyox kōmēn Nāyane tu' hāpxexka Ganinet kopah, tu ta' nūn, tu nūktu' xupep Yoām tu', ha Yoām te Yeyox putox pix kōnāg kox Yohnām kopah,

<sup>10</sup> tup-tox pix kux, ha kōnāg kopa' xupep Yeyox, tu' pēnāhā', ha ta pexkox xōn, ha ta' yīxohoh Topa Koxuk, yā kuxxutut putuk. 'Ūnūn, tu nūktu Yeyox yīmū' xupep.

<sup>11</sup> Ha ta pexkox kopa Topa te:

—Xōnnē', 'āte mō'āyāy xe'ēgnāg. Xatek kuxa hit-tupmāhā'. Kaxīy.

*Hāmgāyāgnāg te Yeyox xapit*

<sup>12</sup> Hāpxip 'īhā Topa Koxuk te Yeyox mōkutnāhā hām panip xexka tu',

<sup>13</sup> ha ta' mōg, tu' xip, ha Hāmgāyāgnāg te Yeyox xapit, puyīy hāpkummuk mūn mīy, pa' mīy 'ohnāg, ha ta' pip xokxop gāy, pa pexkox yōg nū'pok xop te Yeyox pēnā max. Yā' xip Yeyox 'āmnīy xohix te' 40 hā.

*Yeyox te hāpxopmā kōnāmāhā hāpxexka Ganinet tu'*

<sup>14</sup> Hāpxip ha ta xonat te Yoām mūg, tu kanet ka'ok kopa' xix, 'īhā putpu' nūn Yeyox, tu nūktu' xupep

hāpxexka Ganinet tu', tu Topa yōg hām'āpak max'ax  
'āktux,

<sup>15</sup> tu:

—Hōnhā Topa te yāy yōg tikmũ'ūn xat putup,  
ha' yīpkox pip putup. 'Āpu yā yāyhāhup, nūy  
hāpkummuk mīy kux. 'Āpu yā 'ākuxa mām Topa yōg  
hām'āktux kopah, puyīy Topa 'ākuxa kummuk xit,  
nūy kuxa max mō'tat, 'ūyānān tu'. Kaxīy.

<sup>16</sup> Ta' mōg Yeyox kōnāg xexka Ganinet kux tu',  
pa' pip tik tix, yā Xīmām Pet xix taknōy 'ūxuxet'ax  
'Ānene', ha kōnāg xexka tu mō tutpanip yōn. Yā  
māpxexex putuk, hu mām xukpax.

<sup>17</sup> Ha Yeyox te:

—Mā, nūy 'ūg pe mōg. 'Āxop te mām xuk, pa  
'āte xa hāmyūmmūgāp-tup, xayīy 'ūg ha tikmũ'ūn  
nūnnā'. Kaxīy.

<sup>18</sup> Ha tik te tutpanip nīm, tu ta' mōg Yeyox peheh,

<sup>19</sup> tu' mōg, pa' pip tik tix nōy, yā Tiak xi' taknōy  
Yoām, yā Yemeneo kutok, tu mīpkox kopa' mām, tu  
tutpanip māynāg mīy,

<sup>20</sup> ha Yeyox te tik xānāhā', ha' tak nīm xix  
kāmānat xop nīm mīpkox kopah, tu Yeyox pe' mōg.

### *Tik kopa' xip yāmīy kummuk*

<sup>21</sup> Tu' mōg Yeyox xix yōg tihik, tu mōktu' mōxaha  
kōmēn Kapānām tu', tu' nox pip. Nit xap ha ta' mōg  
Yeyox, tu Yoneo xop yōg Topa pet hā mō'nāhā', tu  
tikmũ'ūn pu hāmyūmmūgāhā',

<sup>22</sup> ha tikmũ'ūn te' xupak, tu hāmyūmmūg'ax  
putuppax. Yā Yeyox 'ūka'ok, tu hāmyūmmūg, tu  
hāmyūmmūgā max, 'ap tik te hāmyūmmūg xop  
putuk'ah.

23 Ha ta' nūn tihik, ha' kopa' xip yāmīy kummuk, ha tik te hām'āktux ka'ok, hu:

24 —Kōmēn Nāyane yōg Yeyox, putep mūn mīy putup? 'Ok 'ānūn, nūy 'ūkputex? 'Āte 'āyūmmūg. Topa te 'āyāyikutnāhā'! Kaxīy.

25 Pa Yexox te yāmīy kummuk xat, hu:

—Hām'āktux hok, nūy ta 'āpep! Kaxīy.

26 Yāmīy kummuk te tik yāy nuhugāhā', tu hām'āktux ka'ok, tu ta hāptopa' xupep,

27 ha tikmū'ūn kuxa te' yēy, tu' yīkopit, hu:

—Pute 'ūm? 'Ok tute hāpxop tup yūmmūgāhā'? Tute yāmīy kummuk xat, ha' yīpkox pip, nūy xupep. Kaxīy.

28 Hāpxip kutōgnāg 'ihā tikmū'ūn xohix te' yūmmūg hāpxexka Ganinet xexka tu', Yeyox te hāpxopmā max xe'ēgnāg.

*Yeyox te Xīmām Pet xetut mūktut hittupmāhā'*

29 Tu ta' mōg Jesus xix Tiak xix Yoām, tu mōktu' mōxaha Xīmām Pet pet hā, yā 'Ānene pet kamah.

30 'Ūxip Xīmām Pet xetut mūktut, tu' pip, tu' xax pukpex, ha tikmū'ūn te nōm 'āktux mō'ka'ok,

31 ha ta' mōg Yeyox 'ūn yīkāgnāg, tu' nōy yīm mūg, tu' yīm xīnnāhā', ha' yūm, tu' xuxi', tu' nōy pu' hām mīptut kopah.

*Yeyox te tikmū'ūn pakut xohix hittupmāhā'*

32 'Āmāxāgnāg, ha ta tikmū'ūn te' nūnnāhā tikmū'ūn pakut xohix xix yāmīy kummuk te tikmū'ūn kopa' pip xop nūnnāhā Yeyox tu'

33 ha ta' nūn kōmēn yōg tikmū'ūn xohix xexka', tu nūktu mīptut yīkāgnāg tu' pip, nūy pēnā',

<sup>34</sup> ha Yeyox te tikmũ'ün pakut xohix hittupmāhā', tu hāmpakut xohix mōy, tu yāmīy kummuk xohix mōy, ha yāmīy kummuk xohix te Yeyox yūmmūg, yīy Yeyoy te nōm xat, pu hām'āktux hok.

*Yeyox xip hāpxexka Ganinet tu'*

<sup>35</sup> Hāptup nūn, ha ta Yeyox yāy koxak, tu ta' mōg, tu mōktu hām panip xexka tu' xupep, tu Topa pu hām'āktux,

<sup>36</sup> pa Xīmām Pet te Yeyox xak xi' xape xop te' xak punethok,

<sup>37</sup> tu' nūn, tu nūktu' xipihi', tu:

—Tikmũ'ün xohix te 'āxak. Kaxīy.

<sup>38</sup> Ha Yeyox te:

—Āpu yūmū mōg xiptuxexka xohix mōyāykoqip, tu' tikmũ'ün nōy hah, nūy Topa yōg hām'āpak max'ax 'āktux hato'a kamah. Yā 'ūgnūn hām xexka tu', nūy tikmũ'ün xohix pu Topa yōg hām'āpak max'ax 'āktux. Kaxīy.

<sup>39</sup> Tu ta' mōg, tu hāpkumep punethok hāpxexka Ganinet xexka tu', tu Topa yōg hām'āpak max'ax 'āktux punethok Yoneo xop yōg Topa pet xohix kopah, tu yāmīy kummuk mōy.

*Yeyox te tik xax kunutnām tapmāhā'*

<sup>40</sup> Ha ta' nūn tihik, tu' xax kunutnām, 'ūnūn, tu nūktu Yeyox yīkāgnāg 'ūkopaxux hā' xip, tu ta tu' xak, hu:

—Āte' yūmmūg. Xatep-tup, nūy ta 'ūkxax tapmā yūmmūg. Kaxīy.

<sup>41</sup> Ha' kuxa ka' punethok, tu' nōy yīmū yāy yīm xix, hu:

—Hamūn, 'ātep-tup. 'Āxax tap. Kaxīy.

42 Hāpxip 'ohnāg 'lhā' xax kunutnām tap. Yā' hittup.

43-44 Ha Yeyox te' xat ka'ok, hu:

—'Ūxupax. Tikmũ'ũn pu nũ hāpxopmā'ax 'āktux hok. Mōg 'āmānex hah, puyīy 'āxax pēnā'. 'Āpu 'āmānex pu hāpxop hōm, puyīy Topa pu nōm hōm, xayīy Mōyyex yōg xat'ax mīy. Hā kaxīy tikmũ'ũn te' yūmmmūg, 'āxax tap. Kaxīy.

Tu tik xat, pu mōg.

45 Ha ta' mōg tihik, tu' xohix pu hām'āktux kōnāmāhā', hu:

—Pēnā', Yeyox tek xax tapmāhā'. Kaxīy.

Hā kaxīy Yeyox te kōmēn xohix hā' mō'nā xaptop 'ohnāg. Yā tikmũ'ũn te Yeyox yūmmmūg, yīy ta' nox xip hām panip xexka tu', ha ta' nūn tikmũ'ũn xohix, nūy Yeyox xax.

## 2

### *Yeyox te tik hāpkumep hok hittupmāhā'*

<sup>1</sup> Āmnīy xohix nōg, 'lhā putpu' mōg Yeyox kōmēn Kapānām tu', tu nūktu mīptut hā mō'nāhā'. Pa hāpxip 'lhā tikmũ'ũn te hām'āktux, ha tikmũ'ũn xohix te' yūmmmūg, 'ūxip Yeyox,

<sup>2</sup> tu ta' nūn tikmũ'ũn, yā yāytunū'nāhā 'ūxohix, ha mōktu mīptut hā nū'xīmnāg xix hāmyīkox yīka nū'xip kama hāptopah, ha Yeyox te tikmũ'ũn pu Topa yōg hām'āktux'ax 'āktux,

<sup>3</sup> ha ta' nūn tik te' 4, tu tik hāpkumep hok nūnnāhā', yā tutpe hā mō'tat.

<sup>4</sup> 'Ūnūn pa' pip tikmũ'ũn xohix, yīy ta Yeyox ha' mōg 'ohnāg mīptut kopah, hu ta pepi' mōg, tu mōktu mīptut yīmũ' mām, tu hāpxax mōy Yeyox

xuka', tu ta hām tu tutpe hā tik pakut xix Yeyox keppa',

<sup>5</sup> ha Yeyox te' yūmmūg tik kuxa mām ka'ok. Yeyox te tik hāpkumep hok pu hām'āktux, hu:

—'Ūgnix, Topa te 'ōg hāpkummuk mīy'ax xaxogāhā', ha' kux. Kaxīy.

<sup>6</sup> Ha ta' pip tik te hāmyūmmūg xop, tu' kuxa kopa' yīkopit, hu:

<sup>7</sup> “Texīy hām'āktux? Tute Topa 'āktux kummuk! Tep te hāpkummuk mīy'ax xaxogā yūmmūg? Yā Topap-xehnāg te'!” Kaxīy.

<sup>8</sup> Pa Yeyox te tik yōg hāpe'paxex'ax yūmmūg, tu:

—Texīy 'ākuxa kopa 'āyīkopit?

<sup>9</sup> Hām'āktux 'ūm yāyxat 'ohnāg? 'Ok pe tik hāpkumep hok pu hām'āktux, hu: “Āte 'ōg hāpkummuk mīy'ax xaxogāhā', ha' kux,” kaxīy, 'ok pe hām'āktux, hu: “Āpu 'āyīpxit, nūy pepix xihip, nūy 'ōg tutpe pepix xup, nūy ta mōg”? Kaxīy.

<sup>10</sup> Āte hāpxopmā putup, ha 'āxop te' pēnāp-tup, hu' yūmmūg, 'ūgmūn yā Tikmū'ūn Kutok te tikmū'ūn yōg hāpkummuk mīy'ax xaxogā'ax nūnte hām xexka tu'. Kaxīy.

Tu tik hāpkumep hok pu hām'āktux, hu:

<sup>11</sup> —'Āpu 'āyīpxit, nūy pepi xihip, nūy 'ōg tutpe pepi' xup, nūy ta mōg yāy pet hah. Kaxīy.

<sup>12</sup> Hāpxip 'ohnāg 'īhā tik te hāpkumep hok yīpxit, nūy pepi' xip, nūy yāy yōg tutpe pepi' xup, tu ta' mōg, ha tikmū'ūn xohix te' pēnāhā', tu' kuxa te' yēy, tu Topa 'āktux max, hu:

—Tikmū'ūn te hāpxopmā'ax nōy hā kaxīy pēnā 'ohnāg! Kaxīy.

*Yeyox xix Nemi'*

13 Ta xe' mōg Yeyox, tu mōktu' xupep kōnāg xexka Ganinet tu', ha ta' nūn tikmũ'ūn xohix Yeyox hah, ha' xohix pu hāmyūmmūgāhā'.

14 Tu ta' mōg, pa' xip Nemi', yā 'Āppeo kutok, tu' yūm gohet pupi tayūmak pop'ax pet kopah, ha Yeyox te Nemi pu hām'āktux, hu:

—Mā, nūy 'ūkpe mōg. Kaxīy.

Nemi pepi' xip, tu ta pe' mōg, tu mōktu Nemi pet hā' mōxaha',

15 ha hāpxip 'ihā' xit Yeyox xix yāy yōg tik xop xix gohet pupi tayūmak pop'ax xop xix hāpkummuk mīy'ax xop nōy,

16 ha ta' nūn tik te hāmyūmmūg xop xix Paniye xop nūn, tu nūku' pēnāhā', Yeyox xit tik mūtik xix gohet pupi tayūmak pop'ax xop mūtik, tu Yeyox yōg tik xop pu' yīkopit, hu:

—Teptu Yeyox xit 'ūkummuk xop mūtik? Kaxīy.

17 Ha Yeyox te' xupak, tu tik te hāmyūmmūg xop pu hām'āktux, hu:

—Nonot xop te' hittup xop hā te 'ohnāg, pa pakut xop hā tehet. Hā kaxīy 'ūgnūn, nūy hāpkūmmuk mīy'ax xop xānā', pa' max xop xānā' 'ohnāg. Kaxīy.

*Yeyox te' xit hok 'āktux*

18 Ha ta' pip Yoām mūtik mōg xop xix Paniye xop, tu' xit hok, nūy Topa pu hām'āktux.

Ha ta' xip Yeyox, ha ta' nūn tikmũ'ūn, tu nūktu' yīkopit, hu:

—Yoām mūtik mōg xop xit hok, nūy Topa pu hām'āktux xix Paniye xop te' kamah. Texīy 'ōg tik te' 12 xop xit hok 'ohnāg, nūy Topa pu hām'āktux? Kaxīy.



19 Ha Yeyox te:

—Tikmũ'ũn te yāyta pēnāhā', ha' xip tik te yāy-tap-tup. 'Ok tikmũ'ũn xit hok nōmhā'? 'Āmhok, yā' xit.

20 Nāy, pu tik te yāyta mōg, ha tikmũ'ũn xit hok nōmhā'. Hā kaxīy 'ūkxip, 'īhā yāy yōg tik te' 12 xit hok 'ohnāg. Nāy, 'ūgmōg putup, 'īhā' xit hok putup. Kaxīy.

21 Tu Yeyox te xe:

—Tikmũ'ũn te' xap 'ohnāg topixxax yāg tup, yā' pix 'ohnāg, xix topixxax kunox. Ka' xap, ha' pix, puxix yāg yāy nū'nā', ha topixxax yāy pot.

22 Ha ta' pux 'ohnāg tikmũ'ũn te xupyāg tup xokxax kox kutut kopah. Ka' pux, puxix xupyāg xokxax kox koxyōy, ha' xaxok xupyāg, ha' kummuk xokxax kox. Pa' pux xupyāg tup xokxax kox tup kopah, pu' max. Hā kaxīy tikmũ'ũn te mōnāyxop yōg hāpxopmā'ax tat, xix kama yōgnū hāpxopmā'ax tat, pu' kummuk. Kaxīy.

### *Yeyox te 'āmnīy hām hok 'āktux*

23 Nit xap, yā 'āmnīy hām hok, ha ta' mōg Yeyox xix yāy yōg tik te 12 xop, tu mōktu xuxnāg ta xe tox yōg hām mep, tu xuxnāg ta xe tox mep, nūy mā',

24 ha ta' nūn Paniye xop tu' yīkopit, hu:

—Tepu 'ōg tik xop te' mep 'āmnīy hām hok 'īhā'? Yā' kummuk. Yūmū yōg xat'ax kax'āmi tappet tu', tu' xat, pu hām hok 'āmnīy hām hok 'īhā'. Kaxīy.

25 Ha Yeyox te:

—'Ok 'āxop te' mōkupix tappet tu'? Putep mūn mīy Namix? Yā putup tep-tex Namix xix yāy yōg tihik.

26 Namix mōg, tu mōktu Topa pet hā mō'nāhā', pa' mām pām, yā Topa keppa' mām, ha Namix te' pām pop tu' māhā', tu yāy yōg tik xop pu' popmāhā',

puyīy mā', 'lhā 'āmānex yā 'Amit, tu 'āmānex xop xohix xat 'ūkax'āmi yūmū yōg xat'ax yōg tappet tu'. 'Ūxat, pu 'āmānex te nōm pām mā', pa' nōy mā hok, pa Namix te' māhā'. Kaxīy.

<sup>27</sup> Ha Yeyox te xe:

—Topa te tikmū'ūn pu 'āmnīy hām hok mīy, pa 'ap 'āmnīy hām hok pu tikmū'ūn mīy'ah. Yā 'āmnīy hām hok te tikmū'ūn yōg kāmānat putuk, pa tikmū'ūn te 'āmnīy hām hok yōg kāmānat putuk 'ohnāg,

<sup>28</sup> ha tak mūn Tikmū'ūn Kutok te' xat 'āmnīy hām hok yōg hāpxopmā'ax. Kaxīy.

### 3

*Yeyox xix tik yīm te nū' yāy nūnnāhā'*

<sup>1</sup> Tu ta' mōg Yeyox, tu mōktu Yoneo xop yōg Topa pet hā xe mō'nāhā', pa' xip tihik, tu' yīm te nū' yāy nūnnāhā',

<sup>2</sup> ha ta' pip tikmū'ūn, tup-tup, nūy Yeyox hāpkummuk mīy pēnā' nit xap 'lhā', nūy hām'āktux, hu:

—Yeyox te' xat'ax mīy 'ohnāg. Kaxīy.

<sup>3</sup> Ha Yeyox te tik pu hām'āktux, hu:

—Mā'. Kaxīy.

<sup>4</sup> Tu ta tikmū'ūn pu hām'āktux hu:

—Putep xat Topa yōg xat'ax yōg tappet? Putep xat, puyīy tikmū'ūn hāpxopmā nit xap 'lhā', yā 'āmnīy hām hok 'lhā': 'ok pe hāpxopmā max, 'ok pe hāpxopmā kummuk? 'Ok pe tikmū'ūn hīnnāhā, 'ok pe tikmū'ūn nīm, puyīy xakix? Kaxīy.

Pa tikmū'ūn te hāmaāktux 'ohnāg.

<sup>5</sup> Ha' gāy Yeyox, tu' kuxa hittup 'ohnāg, tikmū'ūn te hāmyūmmūg putup 'ohnāg hah.

Ta Yeyox te tik pu:

—'Āpu yā 'ūyoa 'āyīm. Kaxīy.

Ha' yoa', ha' yīm hittup.

<sup>6</sup> Hāpxip ha ta' mōg Paniye xop, tu mōktu xat'ax xexka 'Enot yōg xop mūtik hām'āktux, tu hām'āktux texīy Yeyox putex putup.

*Yeyox te pakut xop nōy hittupmāhā'*

<sup>7</sup> Ha ta' mōg Yeyox xix yāy yōg tik te 12 xop, tu mōktu' mōxaha kōnāg xexka Ganinet kux tu'. Ha ta' nūn tikmū'ūn xohix, yā hāpxexka Ganinet yōg xop, xix hāpxexka Yonex yōg,

<sup>8</sup> xix kōmēn Yenoyanēn yōg, xix hāpxexka 'Inumēn yōg, xix kōnāg kox Yohnām kūnāpa yōg xop, xix kōmēn Tinok yōg, xix Tinok yīmap pip xop, xix kōmēn Xinōm yōg, xix Xinōm yīmap pip xop. Yā' xohix te Yeyox yōg hāpxopmā'ax 'āpak, hu' nūn, nūy Yeyox pēnā',

<sup>9</sup> ha ta yāy yōg tik xop mō'pok Yeyox te, puyīy mīpkox nūnnā', puyīy tikmū'ūn xohix Yeyox mō'yōn hok.

<sup>10</sup> Yā tikmū'ūn xohix hittupmāhā Yeyox te', yīy ta tikmū'ūn pakut xohix nūn, nūy yāy mō'yōn, nūy Yeyox 'āpit, puyīy hittupmā'.

<sup>11</sup> Ha ta' pip tikmū'ūn, tu' kopa' pip yāmīy kummuk, tu' nūn, tu nūktu kup tomāhā Yeyox keppah, tu hām'āktux ka'ok, hu:

—'Āmūn yā Topak-tok! Kaxīy.

<sup>12</sup> Pa Yeyox te yāmīy kummuk xat ka'ok, hu:

—Hām'āktux hok, yāg-mūn yā Topak-tok 'āktux hok. Kaxīy.

*Yeyox te yāy yōg tik te 12 yīymōgātux*

13 Tu ta' mōg Yeyox, tu mōktu yīktix tu' pūnānep, tu' nōy xānāhā', ha ta' nūn,

14 ha Yeyox te tik te 12 yīmōgātux, puyīy Yeyox mūtik mōg, puyīy Yeyox tik mō'pok, puyīy tik Topa yōg hām'āpak max'ax 'āktux, yā' xuxet'ax Yeyox yōg mō'pok xop.

15 Yeyox te nōm ka'ogāhā, pu yāmīy kummuk mōy.

16 Tik te 12 xop kopa' pip yā Xīmām, kama' xuxet'ax Pet,

17 xix Tiak xi' taknōy Yoām, yā Yemeneo kutok, yā Tiak xix Yoām 'āxet'ax nōy Motnēy, yā tikmū'ūn yīy'ax kopa yā' yāy no'ok kutok,

18 xix 'Ānene', xix Pinip, xix Matōmēo, xix Māteo, xix Tōmē', xix 'Appeo kutok Tiak, xix Tanep, xix Xīmām, yā tutep-tup, puyīy 'Iyaet xop yāyhā xexkah,

19 xix Yot 'Ixkanot, yā tute' gāy xop mōgāhā Yeyox hah, puyīy xūygā'.

### *Yeyox xix Hāmgyāgnāg*

20 Ha ta' nūn Yeyox, tu nūktu mīptut hā mō'nāhā', ha tikmū'ūn xohix nūn, ha Yeyox xit putup, pa yā' xit 'ohnāg, yā tikmū'ūn xohix pip.

21 Ha ta' nūn Yeyox xape xop, nūy Yeyox mōgā', yā' xupak tikmū'ūn te' xuktux Yeyox putox kummuk,

22 ha kōmēn Yenoyanēn yōg tik te hām yūmmūg xop te:

—Yeyox kopa' xip Meyemo', yā yāmīy kummuk xop yōg xat'ax, ha Meyemo te Yeyox ka'ogāhā', puyīy yāmīy kummuk mōy. Kaxīy.

23 Ha Yeyox te tikmũ'ũn xohix xānāhā', nũy hāmyũmmũgā', tu hām'āktux'ax hā hāmyũmmũgāhā'. Tute:

—Texīy Hāmgāyāgnāg te tikmũ'ũn kopa yāy xut?

24 Hāpxexka yōg tikmũ'ũn te yāy pot, nũy yāy kix, tu hāpxip 'īhā' xakix 'ũxohix.

25 'Ūxape xop te yāy pot, nũy yāy kix, tu hāpxip 'īhā' nōg 'ũxape xop.

26 Hā kaxīy Hāmgāyāgnāg xop te yāy pot, nũy yāy kix, puxix xakix 'ũxohix.

27 —'Ūxupxet te hāpxop hā' xupxet putup mīptut kopah, pa' xip tik ka'ok mīptut kopah. Texīy hāpxop xupxet putup? Yā tik ka'ok poxit hā' hīy hāmāxap, tu nōmhā' xupxet. Hā kaxīy 'āte Hāmgāyāgnāg hīy, nũy tikmũ'ũn kopa yāmīy kummuk mōy.

28 —'Āpu 'ũxaxogā hok. Topa te tikmũ'ũn yōg hāpkummuk mīy'ax xohix xaxogā yũmmũg, pu tu' kux. Tikmũ'ũn te Topa 'āktux kummuk, ha Topa te' xaxogā yũmmũg, pu tu' kux.

29 Pa tikmũ'ũn te Topa Koxuk 'āktux kummuk, ha Topa te' xaxogā yũmmũg 'ohnāg. Yā' xip 'ũyōg hāpkummuk mīy'ax mōkuma' mōg, tu' kux 'ohnāg. Kaxīy.

30 Hā kaxīy hām'āktux Yeyox. Hamũn, tikmũ'ũn te hām'āktux, 'ũxip yāmīy kummuk Yeyox kopah. Pa 'āmhok, yā Topa Koxuk te' kopa' xip.

### *Yeyox mūktut xi' taknōy xop*

31 Ha ta' nũn Yeyox mūktut xi' taknōy xop, tu nūktu hāptopa' pip, tu' nōy mō'kutnāhā', puyīy Yeyox xānā'.

32 Ha ta kopa' mām tikmũ'ũn Yeyox mūtik, tu hām'āktux, hu:

—Hāptopa' pip 'ātut xix 'ātaknōy xop, tu 'āxānāhā'.  
Kaxīy.

<sup>33</sup> Ha:

—Tep-te 'ūktut putuk xik taknōy xop putuk?  
Kaxīy.

<sup>34</sup> Tu' yāy yīmap xop pēnāhā', tu:

—Pēnā nūhū', yāg tut xik taknōy xop.

<sup>35</sup> Nōm te' mīy Topa te nōm putup, yāg taknōy xop  
xik hex xik tut yāg xape xop. Kāxīy.

## 4

### *Hāpxopxap*

<sup>1</sup> Ta xe tikmū'ūn pu hāmyūmmūgāhā Yeyox te  
kōnāg xexka Ganinet kux tu', ha ta' pip tikmū'ūn  
xohix, yīy ta' mō'nāhā mīpkox hā, tu' yūm, ha' pip  
tikmū'ūn hāmhūmnāg hām kux tu',

<sup>2</sup> ha Yeyox te hām'āktux'ax hā hāpxop xohix  
yūmmūgāhā', nūy Topa yōg hāpxopmā'ax  
yūmmūgāhā', tu:

<sup>3</sup> —'Ūgxupex, 'ūmōg tihik, nūy hāpxopxap mō'pok,

<sup>4</sup> tu hāpxopxap mō'pok, ha yāg te nū'nāhā putat  
kopah, ha ta' nūn putuxnāg, tu' xohix māhā',

<sup>5</sup> ha ta' yāg nōy te nū'nāhā hām kutōgnāg kopa  
mīkaxxap yīmū' yūm, tu hāpxip kutōgnāg 'ihā' xokax  
hām tūnēmnāg tu',

<sup>6</sup> pa māyōn xip, ha mō'hap, tu' nak, yā' yīpxatit  
kutōgnāg, hu' nak,

<sup>7</sup> ha ta' yāg nōy te nū'nāhā mīmyām kup kakak, tu'  
xokax, tu' tuk, ha mīmyām kup tuk, tu' nōy mō'nīy,  
ha' ta 'ohnāg,

<sup>8</sup> ha ta' yāg nōy te nū'nāhā hām max kopah, tu'  
xokax, tu' tuk, tu mōktu kup puxet te mīnta te' 30

popmāhā', ha ta kup nōy ta' tu 60, ha ta kup nōy ta tu 100. Kaxīy.

<sup>9</sup> Tu xe:

—'Āyīpkox pip, nūy ta 'āpu yā xupax. Kaxīy.

*Yeyox te hāpxopxap 'āktux*

<sup>10</sup> Ha ta' mōg tikmū'ūn punethok, ha ta' yāg xip Yeyox mūtik xix Yeyox yōg tik te 12 xop mūtik, tu yāy tu nū'nāhā', nūy Yeyox mūtik hām'āktux, tu:

—Hāmyūmmūg'ax 'ūm yūmmūgāhā xate? Kaxīy.

<sup>11</sup> Ha:

—Texīy Topa te yāy yōg tikmū'ūn xat, ha' yīpkox pip? Topa te xa' mūg. Pa Topa te 'āxop kūnāpa pip xop pu hāmyūmmūgāhā hām'āktux'ax hā,

<sup>12</sup> puyīy hāmpēnā', pa hāmyūmmūg 'ohnāg, puyīy hām'āpak, pa hāmyūmmūg 'ohnāg, puyīy yāy yōg hāpkummuk mīy'ax nīm hok, puyīy Topap-tuppax hok, puyīy Topa tikmū'ūn yōg hāpkummuk mīy'ax xaxogā hok, pu tu' kux 'ohnāg. Kaxīy.

<sup>13</sup> Tu xe:

—'Āxop te hām'āktux'ax yūmmūg 'ohnāg. Texīy 'āxop kūnāpa pip xop te nōm yūmmūg? Kaxīy.

<sup>14</sup> Tu xe:

—Tik te hāpxopxap mō'pok. Hā kaxīy tikmū'ūn te Topa yōg hām'āktux'ax 'āktux, ha hāpxopxap te Topa yōg hām'āktux putuk,

<sup>15</sup> ha ta hāpxopxap yāg te nū'nāhā putat kopah, ha ta' nūn putuxnāg, tu' māhā'. Hā kaxīy tikmū'ūn te Topa yōg hām'āktux'ax 'āpak, pa Hāmgāyāgnāg nūn, tu Topa yōg hām'āktux'ax xut.

<sup>16</sup> Ha ta hāpxopxap yāg te nū'nāhā hām kutōgnāg kopa mīkaxxap yīmū' yūm, tu' xokax, tu' nak mō'ka'ok 'ūyīpxatit kutōgnāg hah. Hā kaxīy

tikmũ'ũn te Topa yōg hām'āktux 'āpak, tu' kuxa hittup,

<sup>17</sup> pa hāpxip 'īhā tikmũ'ũn te' kuxa mām xop kute'ex kummuk, ha' kuxa mām kux.

<sup>18</sup> Ha ta hāpxopxap yāg te nũ'nāhā mīmyām kup kakak, tu' xokax, ha mīmyām te' nōy mō'nīy, ha' ta 'ohnāg. Hā kaxīy tikmũ'ũn te Topa yōg hām'āktux 'āpak,

<sup>19</sup> pa hām xexka yōg hāpxopmā'ax pe'paxex punethok, tu' 'ūp-texop xekap-tup, tu hāpxop xohix putup, hu Topa yōg hām'āktux xaxok, tu hāpxopmā max mīy'ah.

<sup>20</sup> Ha ta hāpxopxap yāg te nũ'nāhā hām max kopah, tu' xokax, tu' tuk, tu mōktu kup puxet te mīnta te' 30 popmāhā', ha ta kup nōy ta' tu 60, ha ta kup nōy ta' tu 100. Hā kaxīy tikmũ'ũn te Topa yōg hām'āktux'ax 'āpak, tu' kuxa mām nōm kopah, tu hāpxopmā max punethok. Kaxīy.

### *Kuyānām*

<sup>21</sup> Tu Yeyox te xe:

—'Ok tikmũ'ũn te kuyānām tat'ax xex manax kopah? 'Āmhok. 'Ok tikmũ'ũn te kuyānām tat'ax xex mīmpe mō'yōn'ax kakak? 'Āmhok. Pa tikmũ'ũn te kuyānām tat'ax yōg yūm'ax yīmũ' xex, ha nōmhā kuyānām max, ha tikmũ'ũn te hāpxop pēnāhā'.

<sup>22</sup> Hā kaxīy tikmũ'ũn te hāpxopmā xaptop hōnhā', ha tikmũ'ũn te' pēnā 'ohnāg, pa hāpxip 'īhā tikmũ'ũn xohix te' pēnāp-tup.

<sup>23</sup> 'Āyīpkox pip, nūy ta 'āpu yā xupax. Kaxīy.

<sup>24</sup> Ta Yeyox te xe:

—'Āpu 'ākuxa hā' xupax. Xate 'ānōy yōg hāpxopmā'ax kopit, puxix Topa te 'ōg hāpxopmā'ax



kopit, yā' yāy putuk, yā Topa te 'ōg hāpxopmā'ax kopit xe'ēgnāg putup.

<sup>25</sup> Tikmū'ūn yōg hāpxop pip, puxix hāpxop nōy pop putup. Tikmū'ūn yōg hāpxop kutōgnāg pip, puxix nōm xaxok putup.

### *Hāpxopxap*

<sup>26</sup> Tu Yeyox te xe:

—Texīy Topa te yāy yōg tikmū'ūn xat, ha' yīpkox pip? Yā' putuk, tik te hāpxopxap mō'pok, ha' xokax, tu' tuk.

<sup>27</sup> Texīy 'ūxokax? Texīy 'ūtuk? Tik te' yūmmūg 'ohnāg. 'Āmnīy hā mō'yōn, tu hāptup hā hāpkumep, 'ihā' tuk.

<sup>28</sup> Hāpxopxap te hām hā' mōxaha', tu' xokax, tu' tuk, ha' tut pip, ha' xap ta punethok.

<sup>29</sup> Yā' ta, ha tik te' mep kupukhe hā, tu' nūnnāhā'. Hā kaxīy Topa yōg tikmū'ūn xohix nōy nā' mōg, Topa te nōm xat. Kaxīy.

### *Mōytat xap*

<sup>30</sup> Tu Yeyox te xe:

—Texīy Topa te yāy yōg tikmū'ūn xat, ha' yīpkox pip? Texīy 'āte xa hāmyūmmūgāp-tup?

<sup>31</sup> Yā hāpxopxap putuk, yā mōytat xap putuk. Yā' kutōgnāg mōytat xap, pa hāpxopxap nōy xohix 'ūxexkah.

<sup>32</sup> Tikmū'ūn te mōytat xap xok, tu' xokax, tu' tuk, tu mōktu kup tox, ha ta' kup nōy kutōgnāg, ha mōytat kup māg xexkah, ha ta' nūn putuxnāg, tu yāy pet mīy mīm māg tu'. Hā kaxīy Topa yōg tikmū'ūn xop kutōgnāg hāmāxap, pa' xohix nōy nā'mōg tu mōktu' xohix. Kaxīy.

<sup>33</sup> Hã kaxĩy Yeyox te tikmũ'ũn pu hãmyũmmũgã punethok hãm'ãktux'ax hã, yĩy tikmũ'ũn te hãmyũmmũg.

<sup>34</sup> Yã tikmũ'ũn pu hãmyũmmũgãhã hãm'ãktux'ax hã, pa yãy yõg tik te 12 xop mütik hãm'ãktux nõy, nũy hãmyũmmũgã'.

*Yeyox te 'ãmuuh xat xix kõnãg tot*

<sup>35</sup> ãmnĩy ha ta yãy yõg tik xop pu Yeyox te:

—'ãpu yũmũ kõnãg xexka xak, nũy kũnãpa mõg. Kaxĩy.

<sup>36</sup> Ha Yeyox yõg tik xop te tikmũ'ũn mõ'pok hato'ah, ha' mõg, ha ta' mõg tihik Yeyox hah, tu yõg mĩpkox hã' mõxaha', tu ta' mõg Yeyox mütik, ha ta mĩpkox xape mõg kama nũmütik,

<sup>37</sup> pa hãpxip 'ihã 'ãmuuh xexka nũn, ha ta' nũn kõnãg tot xexka', tu nũktu mĩpkox hã' mõxaha', ha mĩpkox te kõnãg hã nũ'xip,

<sup>38</sup> ha Yeyox mõ'yõn mĩpkox xahixpa tu', tup-tox tep-tox yũm'ax yĩmũ' yũm, ha Yeyox yõg tik xop te' nuhuk, ha' koxak, ha hãm'ãktux, hu:

—Yãyã, yũmũg xakix putup. 'Ok 'ũgmũg kuxa ka'? Kaxĩy.

<sup>39</sup> Ha Yeyox yok, tu 'ãmuuh xat xix kõnãg tot, puyĩy tu xuxix, ha' xuxix, tu nũ'yey.

<sup>40</sup> Ha Yeyox te yãy yõg tik xop pu yĩkopit, hu:

—Texĩy 'ãkuxa nõg? 'Ok 'ãkuxa mãm 'ohnãg? Kaxĩy.

<sup>41</sup> Ha tik kuxanõg, tu:

—'ũ'ũm tihik? Yã tute 'ãmuuh xat xix kõnãg tot, ha' xuxix, tu nũ'yey! Kaxĩy.

## 5

*Tik kopa' pip yāmīy kummuk*

<sup>1</sup> Tu ta' mōg Yeyox xix yāy yōg tik xop mīpkox hā, tu mōktu' mōxaha kōnāg xexka Ganinet kux tu' hāpxexka Yenax tu',

<sup>2</sup> tu mīpkox nīm, tu ta' mōg, pa' xip tihik, ha tik kopa' pip yāmīy kummuk.

<sup>3</sup> Yā tik pet yūm xukpot tu', ha' nūn. Yā' gāy, ha tikmū'ūn te' hīy yūmmūg 'ohnāg māxap hā.

<sup>4</sup> Yā tikmū'ūn te' mūg punethok, nūy māxap hā' hīy 'ūyīm xi' pata', pa tik te' koxyōy 'ūxohix, tu' mōg. Yā tikmū'ūn te' hīy yūmmūg 'ohnāg.

<sup>5</sup> Hāptup 'īhā' xip tihik yīktix tu' xix xukpot tu' xix 'āmīy 'īhā kamah, tu' xahok ka'ok, tu yāy po'oxnām mīkaxap hā.

<sup>6</sup> Ta Yeyox pēnāhā hāptox tu, tu ta' nōy ha' nūn mō'ka'ok, nūktu Yeyox pu nū'xup,

<sup>7</sup> tu hām'āktux ka'ok, hu:

—Yeyox, yā Topa xexka xe'ēgnāg kutok, 'āte xa tatu' xak: 'Āpu yā 'ūgkummugā hok! Kaxīy.

<sup>8</sup> Yā hamūn, Yeyox te: “Yāmīy kummuk, tik kopa 'āpep!” Kaxīy.

<sup>9</sup> Tu Yeyox te:

—'Āxuxet'ax texīy? Kaxīy.

Ha:

—'Ūkxuxet'ax 'Ūxohix Xop, yā 'ūgmūgmūn punethok. Kaxīy.

<sup>10</sup> Tu xe:

—'Āpu 'ūgmūg mō'pok hato'a hāptox tu'. Kaxīy.

<sup>11</sup> Ha ta' pip xapup xohix, tu' xit yīktix tu' hāmhūmnāg.

<sup>12</sup> Ha yāmīy kummuk te Yeyox pu hām'āktux, hu:

—'Āpu 'ũgmũg xat, 'ũyĩy xapup hã mōxãn' Kaxĩy.

<sup>13</sup> Ha Yeyox te' xat, ha tik nĩm, tu ta' mōg, tu mōktu xapup hã' mōxaha'. Yã' xohix xapup, yã' xohix te' 2000 kōmnãg, tu ta' mōg mō'ka'ok, tu mō'yĩyxoho', tu mōktu kōnãg xexka hã' mōxaha', tu' xakix xit hã.

<sup>14</sup> Ha ta' nũ'paha xapup pēnã'ax xop, tu nōm 'ãktux kōmēn yōg tikmũ'ũn pu xix hãm panip yōg tikmũ'ũn pu',

<sup>15</sup> ha ta' nũn tikmũ'ũn xohix, nũy hãm pēnã', tu' nũn, tu nũktu Yeyox yĩka' pip, tu tik pēnãhã', pa' pip'ah yãmĩy kummuk tik kopah, ha tikmũ'ũn kuxa te' yēy. Yã tik yũm, tu' xax taha', tup-tox max.

<sup>16</sup> Ha ta tikmũ'ũn pu hãpxopmã'ax xohix 'ãktux nōm te tik pēnãhã xix xapup,

<sup>17</sup> tu Yeyox pu tatu' xak, puyĩy mōg hato'ah,

<sup>18</sup> ha ta' mōg Yeyox, tu mĩpkox hã mō'nãp-tup, ha tik nũn, tu:

—'Ūgmōg putup 'ãmũtik. 'Ok max? Kaxĩy.

<sup>19</sup> Pa Yeyox te:

—'Āmhok. 'Āpu mōg yãy pet hah, nũy 'ãxape xop pu' xuktux yũmũg xuxyã Topa te xa' mĩy. Kaxĩy.

<sup>20</sup> Ha ta' mōg tihik, tu mōktu hãm'ãktux Kōmēn te' 10 tu', xix kōmēn yĩkak, yã' xuktux Yeyox te' mĩy, ha tikmũ'ũn xohix tep-tup pax.

### *Yax te Yeyox xãnãhã'*

<sup>21</sup> Ha ta' mōg Yeyox mĩpkox hã, tu kōnãg xexka xak putpu', tu mōktu' xupep, ha ta' nũn tikmũ'ũn xohix, nũy Yeyox pēnã',

<sup>22</sup> ha ta' nũn tihik 'ũxuxet'ax Yax, yã Yoneo xop yōg Topa pet yōg tik xat'ax, 'ũnũn, tu nũktu Yeyox pata yĩka' mōhãmnĩy,

23 tu:

—'Ūk-tok hex xok putūmnāg. 'Āpu mōg, nūy 'ūyīmū 'āyīm nōm, puyīy xuxix, puyīy hi'! Kaxīy.

24 Ha ta' mōg Yeyox tik mūtik xix tikmū'ūn xohix mūtik. Yā tikmū'ūn xohīynāg, hu yāy mō'yōn.

*Yeyox te 'ūn pakut hittupmāhā'*

25 Ha ta' nūn 'ūhūn, yā' pakut, yā 'ūn hep kux 'ohnāg hāmyāxatamuk xohix te' 12 hā.

26 Yā nonot punethok te tu' popmāhā hehmēn, yīy tayūmak noa'. Yā' hittup 'ohnāg, pa' pakut xexka nōy nā' mōg.

27 Tikmū'ūn te Yeyox 'āktux, ha 'ūn te' xupak, tu ta' mōg, tu tikmū'ūn xohix kopa' mōg, tu Yeyox pe' mōg, tu' topixxax 'āpit.

28 Yā 'ūn te hāmpē'paxex, hu: “'Āte 'ūyōg topixxax 'āpit, koxix hittup.” Kaxīy.

29 Hāpxip kutōgnāg 'īhā' hep kux, ha 'ūn te' yūmmūg 'ūhittup xe'e',

30 ha Yeyox te' yūmmūg yāy kopa' xupep hāpka'ok. Yeyox yōkânām, tu tikmū'ūn pu' yīkopit, hu:

—'Ū'ūm te yōg topixxax 'āpit? Kaxīy.

31 Ha Yeyox yōg tik te 12 xop te:

—Tikmū'ūn xohix te yāy mō'yōn 'āyīmap. Texīy xate' yīkopit? Kaxīy.

32 Pa Yeyox yōkânām, nūy pēnā nōm te' xupit,

33 ha 'ūn te' yūmmūg, hu' nūn, tu nūktu Yeyox pata yīka mōhāmnīy, tu' yīpkutuk, hu yāy puxu'ux, tu hāpxopmā xohix 'āktux.

34 Ha Yeyox te:

—Tukūm, 'ākuxa yūm ka'ok 'ūgkopah, hu 'āhittup. 'Āpu 'ākuxa nōg hok. Mōg! 'Āhittup! Kaxīy.

### *Yeyox xix Yax kutok*

<sup>35</sup> Yeyox te 'ūn mūtik hām'āktux, ha ta' nūn Yax yōg kāmānat, yā Yax pet tu' nūn, nūktu:

—Yax, 'āk-tok hex xok. 'Āpu notot Yeyox xānā hok. Kaxīy.

<sup>36</sup> Pa Yeyox te nūmūtik hām'āktux 'ohnāg, pa Yax pu hām'āktux, hu:

—'Āpu 'ākuxa nōg hok. 'Āpu 'ākuxa yūm ka'ok! Kaxīy.

<sup>37</sup> Yeyox te tikmū'ūn xohix xat, pu mōg hok yāy mūtik, pa' xat, pu mōg Pet xix Tiak xix Yoām,

<sup>38</sup> tu ta' mōg, tu mōktu Yax pet hā' mōxaha', pa' pip tikmū'ūn, tu' potaha', tu' xaho ka'ok,

<sup>39</sup> ha Yeyox te:

—Texīy 'āxop potaha', nūy xaho ka'ok? 'Ūk-tok hex xok tāmānāg 'ohnāg. Yā mō'yōn. Kaxīy.

<sup>40</sup> Ha tikmū'ūn yīxix, pa Yexox te xohix xat, pu hāptopa mōg. Yā' mōg 'ūxohix. Ha ta' mōxaha Yeyox xix yāy yōg tik te' 3 xik-tok hex mūktak xi' tut 'ūk-tok hex yōg mīptut kox hā,

<sup>41</sup> ha Yeyox tek-tok yīm mūg, tu:

—“Tanita kōmīy!” Kaxīy. Yā tikmū'ūn yīy'ax hā: “Nixix, 'āpu 'āk-nīhāxip!” Kaxīy.

<sup>42</sup> Yā hāpxip 'ohnāg 'īhāk-tok hex yīpxit, nūy pepi' xip, nūy hāpkumep, ha tikmū'ūn te' yēy. Yāk-tok hex yōg hāmyāxatamuk xohix te 12,

<sup>43</sup> ha Yeyox te tikmū'ūn xat, puyīy tikmū'ūn pu nōm 'āktux hok, tu' xat, puk-tok hex pu xit'ax hōm.

## 6

### *Yeyox xip Nāyane tu'*

<sup>1</sup> Tu ta' nūn putpuk Yeyox xix yāy yōg tik xop kōmēn Nāyane tu', tu nūktu kōmēn hā' mōxaha'.

<sup>2</sup> Nit xap 'ihā' mōg, tu mōktu Yoneo xop yōg Topa pet hā mō'nāhā', tu tikmū'ūn pu hāmyūmmūgāhā', ha tikmū'ūn te' xupak, tu hām'āktux'ax putup nōg, tu:

—Texīy tik te hāpxop xohix yūmmūg? Tep te tik pu hāmyūmmūgāhā'? Texīy tik te hāpxopmā ka'ok xe'ēgnāg?

<sup>3</sup> Yūmū'āte tik yūmmūg. Yā mīmpe mīy, yā Mānix kutok, yā taknōy 'ūxuxet'ax Tiak, xix Yoye', xix Yot, xix Xīmām. Yā' hex tihi nūnteh kamah. Kaxīy.

Yā tikmū'ūn te' yūmmūg putup'ah, Yeyox yā Topak-tok.

<sup>4</sup> Pa Yeyox te:

—Tikmū'ūn te yāy xape 'āpak 'ohnāg nōm te Topa pupi hām'āktux. Kaxīy.

<sup>5</sup> Yeyox te hāpxopmā ka'ok xe'ēgnāg, pa' mīy kutōgnāg. Yā' pakut xop yīmū' yīm xex, nūy hit-tupmā' yā 'a' xohix'ah hittupmāhā' kōmēn Nāyane tu'.

<sup>6</sup> Yā tikmū'ūn kuxa mām 'ohnāg, ha Yeyox kuxa hittup 'ohnāg.

### *Yeyox yōg tik te 12 xop mōg*

Tu ta' mōg Yeyox, tu mōktu xiptuxexka xohix yōg tikmū'ūn pu hāmyūmmūgāhā' kōmēn Nāyane yīkak.

<sup>7</sup> Tu ta' xānāhā yāy yōg tik te 12 xop, ha' nūn, ha Yeyox te nōm ka'ogāhā', puyīy yāmīy kummuk mōy. Tute tik mō'pok, pu mōg 'ūtix tu pe' tix hā kaxīy, puyīy yāmīy kummuk mōy.

<sup>8</sup> Yeyox te:

—Hāpxop tat hok, yā xit'ax tat hok, xix tayūmak tat hok, pa mīm hām tonnognā 'āmōg.

<sup>9</sup> 'Āpu pataxax tat. 'Āpu kāmīn puxešnāg mō'tat. Kaxīy.

<sup>10</sup> Tu xe:

—'Āxop mōg putup, tu kōmēn hā 'āmōxap-tup, tu mīptut hā 'āmōxap-tup. 'Āpu nox pi' mīptut puxet kopah, tu mōktu 'āmōg, tu kōmēn nīm.

<sup>11</sup> Pa kōmēn yōg tikmū'ūn te 'āp-tup nōg, tu hām'āktux'ax putup nōg, nūy ta mōg. 'Āpu nox pi' hok. 'Āxop te yāy pataxax tu hāpxut nuhuk putup, xayīy hām'āktux 'ūkummuk tikmū'ūn. Kaxīy.

<sup>12</sup> Ha ta' mōg Yeyox yōg tik xop, tu tikmū'ūn pu hām'āktux, hu:

—'Āpu 'āyāyhāhup, nūy hāpkummuk mīy kux. Kaxīy.

<sup>13</sup> Tik te yāmīy kummuk mōy, tu tikmū'ūn punethok pakut putox pix heptox hā, tu nōm hit-tupmāhā'.

### *Yoām xok*

<sup>14</sup> Ha ta' xip 'Enot, yā tikmū'ūn yōg xat'ax xexkah, tu nōm hāpxopmā'ax 'āpak, yā tikmū'ūn xohix te Yeyox yūmmūg, tu hām'āktux punethok. Tikmū'ūn yāg te:

—Yā' putpu' hi Yoām nōm tep-tox pix, tu hāpxopmā ka'ok xe'ēgnāg. Kaxīy.

<sup>15</sup> Ha ta yāg te:

—Yā 'Enit. Kaxīy.

Ha ta yāg nōy te:

—Yā tute Topa pupi hām'āktux, yā Topa pupi hām'āktux xop hittap putuk. Kaxīy.

<sup>16</sup> Ha 'Enot te' xupak, tu:

—Yā Yoām nōm tep-tox pix. Hōmā 'āte' xat, pup-tox xax, ha' kuyut, pa hōnhā putpu' hi'! Kaxīy.



17 Hamūn, hōmā 'Enot te' xat, puyīy xonat Yoām mūy, puyīy 'ūyīm hīy, puyīy kanet ka'ok kopa' xix. Texīy? Yā hōmā 'Enot xix 'Enonit te yāy taha', pa 'Enonit yā 'Enot taknōy Pinip xetut,

18 yīy ta Yoām te 'Enot pu hām'āktux, hu: “Yā' max'ah. Topa yōg xat'ax kax'āmīx tappet tu, tu' xat, xayīy yāyta hok 'ātaknōy xetut mūtīk!” Kaxīy.

19 Yīy ta' gāy 'Enonit, tu Yoām putup nōg, hup-tup, puyīy Yoām putex. Pa 'āmīhok,

20 yā 'Enot te Yoām yīpkutuk, yā tute' yūmmūg yā' max xe'ēgnāg Yoām, ha Yoām putex putup'ah. Yoām te 'Enot pu hām'āktux punethok, ha 'Enot kuxa hittup 'ohnāg, pa 'Enot te 'nōy yōg hām'āktux'ax putuppax.

21 Pa hāpxip 'īhā 'Enot te yāy yōg hāmyāxatamuk yōg 'āmuk xexka mīy, ha ta' nūn gohet yōg xexka xop, yā' xat'ax xexka xop, xix xonat yōg xat'ax xop, xix hāpxexka Ganinet yōg xat'ax xop.

22 Ha ta' nūn 'Enonit kutok hex, nūktu' hāmyā max, ha 'Enot tep-tuppax xexka', yā hāmyā max. 'Enot tek-tok hex pu hām'āktux, hu:

—Xate putep-tup? 'Āte xa' hōm putup. Kaxīy.

23 Tu xe hām'āktux xex, hu:

—Xate putep-tup? Yā 'āte xa popmāp-tup hāpxop xohix, tu mōktu yōg hāpxop xahix, yā' xahix yōgnū hāhām, xī' xahix yōgnū tikmū'ūn! Kaxīy.

24 Ha ta' mōg 'ūk-tok hex, nūy tut mūtīk hām'āktux, nūy yīkopit, ha' tut te:

—'Āpu tatu' xax Yoām putox nōm tep-tox pix. Kaxīy.

25 Ha putpu' nūn 'ūxat'ax tu', tu:

—'Ā' hōm mō'ka'ok Yoām putox kãnēypetxax yīmū' yūm! Kaxīy.

<sup>26</sup> Ha ta' kuxa hittup 'ohnāg 'Enot, pa yā hām'āktux xex tu Topa 'āxet'ax 'āktux ha tikmū'ūn xohix te' xupak, yīy ta' hōm putup,

<sup>27</sup> hu hāpxip 'ohnāg 'īhā xonat mō'kutnāhā', puyīy Yoām putox nūnnā', ha ta' mōg xonat kanet ka'ok tu', tu Yoām putox xak,

<sup>28</sup> tu kãnēypetxax yīmū' nūnnāhā', tuk-tok hex pu' hōm, ha ta' mōg, tu' tut pu' hōm.

<sup>29</sup> Ha ta' yūmmūg Yoām mūtik mōg xop, tu ta' nūn, tu nūktu Yoām xokxax paha', tu ta' mōg, tu mōktu mīkaxxap kox kopa' xix xukpot tu'.

*Yeyox te tikmū'ūn xohix pu' xit'ax popmāhā'*

<sup>30</sup> Ha ta' nūn Yeyox yōg tik te 12 xop Yeyox hah, tu nūktu yāy yōg hāpxopmā'ax xohix 'āktux xix yōg hāmyūmmūg'ax xohix,

<sup>31</sup> pa' pip tikmū'ūn xohix, tu xohix te hāpkumep, yīy ta' xit'ohnāg Yeyox yōg tik xop, yā tikmū'ūn xohix pip. Ha Yeyox te yāy yōg tik xop pu hām'āktux, hu:

—'Āpu yūmū mōg hām panip xexka tu', nūy hām hok. Kaxīy.

<sup>32</sup> Tu ta' mōg, tu mīpkox hā' mōxaha', tu ta' mōg, tu kōnāg xak.

<sup>33</sup> Pa tikmū'ūn punethok te mōg'ax pēnāhā', yā' Yeyox pēnāhā xix tik xop. Ha ta' nūn xiptuxexka xohix yōg tikmū'ūn, tu pata hā' nūpaha hām kux tu', tu nūktu' mōxaha', tu' nōy hip.

<sup>34</sup> Ha ta' xupep mīpkox kōnāg xexka kux tu', ha Yeyox te' pēnāhā tikmū'ūn xohix, tu' kuxa ka'. Kahnēn yōg pēnā'ax xip'ah. Hā kaxīy tikmū'ūn

putuk. Yā' hittup 'ohnāg, yīy' kuxa ka', tu tikmū'ūn pu hāmyūmmūgāhā kōnāmāhā hāpxop punethok.

<sup>35</sup> Māyōn mō'nāp-tup 'Ihā' nūn Yeyox yōg tik xop, tu nūktu Yeyox pu hām'āktux, hu:

—Māyōn mō'nāp-tup, yā hām panip xexka nūnteh, yā xit'ax pip 'ohnāg.

<sup>36</sup> Āpu yā tikmū'ūn xat, pu mōg hāpxa'ax tu' xix xiptuxexka tu', puyīy xit'ax pop. Kaxīy.

<sup>37</sup> Pa Yeyox te:

—Āpu tikmū'ūn pu xit'ax popmā'. Kaxīy.

Ha tik xop te:

—Texīy pām popmā tikmū'ūn xohix pu'. 'Ūyōg tayūmak xohix, yā tayūmak 'ānuk xohix te' 200, yā tayumak yānām ponnok. Kaxīy.

<sup>38</sup> Ha:

—Pām xohix texīy pip 'ōhnū'? Mōy pēnā' Kaxīy.

Tik mōg, tu putpu' nūn, tu:

—Yā pām te' 5 xix mām tix. Kaxīy.

<sup>39</sup> Ha Yeyox te tikmū'ūn xat, puyīy xux yīmū' mām, puyīy yānōm xohix hā' mām,

<sup>40</sup> ha' yānōm hā' mām, yā' yānōm kopa' mām xohix te' 100 xi' nōy kopa' mām xohix te' 50 hā kaxīy.

<sup>41</sup> Ha Yeyox te' pām te' 5 pop xix mām tix, tu pexkox pēnāhā', tu:

—Topa, xate nū' popmāhā'. Yā 'āmax. Kaxīy.

Tu pām koxip, tu yāy yōg tik xop pu' popmāhā', puyīy tikmū'ūn pu popmā'. Tik te' popmāhā'. Ha ta mām tix koxip, tu' popmāhā' kamah,

<sup>42</sup> ha tikmū'ūn xohix te' māhā', tu mōktu xe xit putup'ah. Puxix.

<sup>43</sup> Ha ta' mōg Yeyox yōg tik xop, tu pām yāg pop xix mām yāg. Yā pām yāg hā nū'xip manax xohix te' 12 xix mām hā, ha' nūnnāhā'.

<sup>44</sup> Hamūn, yā' xohix te pām māhā', yā' tik xohix te' 5000.

*Yeyox te kōnāg yīmū' mōg pata hā*

<sup>45</sup> Hāpxip 'ihā Yeyox te yāy yōg tik xop pu hām'āktux hu:

—Āpu mīpkox hā mōxakux, nūy mōg kūnāpa hāpkux nōy tu' xiptuxexka Metxax tu', ha 'āte tikmū'ūn mō'pok putup. Kaxīy.

<sup>46</sup> Ha ta' mōg Yeyox yōg tik xop, ha ta' mōg Yeyox, tu yīktix yokoma', nūy Topa pu hām'āktux.

<sup>47</sup> Āmnīy 'ihā' pip Yeyox yōg tik xop mīpkox kopa kōnāg xexka kote', ha ta yāp-xehnāg xip Yeyox hāpkux tu',

<sup>48</sup> tu yāy yōg tik xop pēnāhā'. Tik te mīpkox hā mōgāhā', pa yā mōg putux, yā 'āmuuh te ha' nūn. Hāmyāykuhmōy ha ta' mōg Yeyox, tu kōnāg xexka yīmū' mōg pata hā, tu nōā' yēn putup.

<sup>49</sup> Ha tik te' pēnāhā yā Yeyox te kōnāg yīmū' mōg pata hā, ha hāmpē'paxex yā yāmīy putuk, tu' xahok.

<sup>50</sup> Yā' xohix te' pēnāhā', tu' yīpkutuk. Pa hāpxip 'ihā Yeyox te:

—Ākuxa nōg hok! Yāg mūn. 'Ūgyīpkutuk hok! Kaxīy.

<sup>51</sup> Tu ta mīpkox hā mō'nāhā Yeyox, tu' xip yāy yōg tik xop mūtik, 'ihā' kux 'āmuuh. Ha tik xop kuxa te' yēy,

<sup>52</sup> yā tik te' yūmmūg 'ohnāg texīy Yeyox te tikmū'ūn te' 5000 xitnāhā', yā tik putox ka'ok.

*Yeyox te tikmū'ūn hittupmāhā Yēnēyane tu'*

<sup>53</sup> Tu ta' mōg Yeyox xix yāy yōg tik xop, tu mōktu kōnāg kox kux tu' mōxaha' hāpxexka Yēnēyane tu', tu mīpkox tutxit hā hīy kōnāg kux tu',

<sup>54</sup> tu ta' mōg, pa tikmū'ūn pip, tu Yeyox pēnāhā',

<sup>55</sup> tu ta' mōg, tu' pet xohix ha' xupaha', tu tikmū'ūn pakut tutpe hā' put nūn, tu nūktu Yeyox ha' nūnnāhā', ha Yeyox te nōm hittupmāhā'.

<sup>56</sup> Tu ta' mōg Yeyox, tu hāpkumep xiptuxexka xohix tu' xix kōmēn xohix tu' xix yānōm xohix tu', pa' pip tikmū'ūn xohix, tu' nūnnāhā' tikmū'ūn pakut, tu nūktu nāpet hām tu' xex, tu Yeyox tu' xak, pu tux, puyīy pakut xop Yeyox yōg topixxax kuyāg 'āpit, ha pakut xohix te' xupit, tu' hittup.

## 7

### *Yoneo xop te mōnāyxop yōg hāpxopmā'ax tat*

<sup>1</sup> Ha ta' nūn Paniye xop xix tik te hāmyūmmūg xop, yā kōmēn Yenoyanēn tu' nūn, tu nūktu Yeyox ha yāy tu nū'nāhā'.

<sup>2</sup> Yā hōmā nōm te' pēnāhā' Yeyox yōg tik xop xit 'ūyīm xut putūynāg hā, yā 'ap yīm pix'ah. Yā Paniye xop te tikmū'ūn xat, pu yāy yīm pix.

<sup>3</sup> Yā Yoneo xop te mōnāyxop yōg hāpxopmā'ax tat, ha Paniye xop te Yoneo xop kopa' xip, tu mōnāyxop yōg hāpxopmā'ax tat punethok, tu yāy yīm pix max, tu nōmhā' xit,

<sup>4</sup> tu nāpet tu' nūnnāhā' hāpxop, tu nōm pix 'ūxohix, tu mōnāyxop yōg hāpxopmā'ax nōy tat. Yā kōnāg xo'op'ax pix xix nax xix kanenām.

<sup>5</sup> Tu ta' yīkopit Paniye xop te xix tik te hāmyūmmūg xop te', hu:

—Texīy 'ōg tik xop te mōnāyxop yōg hāpxopmā'ax tat 'ohnāg, hu yāy yīm xut putūynāg hā' xit? Kaxīy.

<sup>6</sup> Ha Yeyox te:

—'Āpa max, pa yā 'ākuxa kummuk. Hōmā 'Iyait te 'āxop 'āktux! Tute kax'āmi, hu: “Topa te: 'Tikmū'ūn tek mūn 'āktux max, pa yā' kuxa tek mūn xak 'ohnāg.

<sup>7</sup> Tikmū'ūn tek mūn pu nūktettex, pa yā' kummuk. Yā tikmū'ūn te yāy yōg hām'āktux'ax 'āktux, tu: Yā Topa yōg xat'ax nūhū'.” Kaxīy.

<sup>8</sup> Tu Yeyox te xe:

—'Āxop te Topa yōg xat'ax mīy 'ohnāg, nūy mōnāyxop yōg hāpxopmā'ax tat. Kaxīy.

<sup>9</sup> Tu Yeyox te xe:

—'Āxop te Topa yōg xat'ax nīm pax, nūy yāy yōg xat'ax mīy.

<sup>10</sup> Yā hōmā Mōyyex te' xat, hu: “'Āpu 'ātak mō'yāy xe'ēgnāg, nūy nōm pu hāpxopmā max. 'Āpu 'ātut mō'yāy xe'ēgnāg, nūy nōm pu hāpxopmā max.” Kaxīy.

<sup>11</sup> Pa 'āxop te tikmū'ūn pu hāmyūmmūgāhā', hu: “'Ūxip tikmū'ūn yōg hāpxop, tu Topa pu' hōm, tu yāy 'ātak pu' hōm 'ohnāg xi' tut pu' hōm 'ohnāg. Nōmhā' max.

<sup>12</sup> Nōmhā' hōm hok.” Kaxīy.

<sup>13</sup> Pa 'āmhok, hām'āktux kummuk. Hā kaxīy 'āxop te Topa yōg hām'āktux 'āpak 'ohnāg, pa yāy yōg ham'āktux 'āpak, tu 'āk-tok pu nōm yūmmūgāhā', tu 'āxop te hāpxopmā kummuk nōy punethok hā kaxīy. Kaxīy.

*Tep te hām kummugāhā'?*

14 Yeyox te xe tikmũ'ũn xānāhā', ha' nūn, ha hām'āktux, hu:

—Āpu yōg hām'āktux'ax 'āpax max, nūy hāmyũmmũg:

15-16 Tikmũ'ũn hāptopa' pip hāpxop, tu tikmũ'ũn hā' mōxaha', tu' kopa' pip nōmhā. Yā hāpxop te kaxīy te tikmũ'ũn kummugā 'ohnāg. Pa hāpxop pip tikmũ'ũn kopah tu' mōxaha', tu mōktu hāptopa' pip. Yā hāpxop te kaxīy te tikmũ'ũn kummugāhā'. Kaxīy.

17 Tu ta' mōg Yeyox, tu mōktu mīptut hā mō'nāhā', ha ta' nūn Yeyox yōg tik xop, nūy Yeyox yōg hām'āktux'ax yīkopit,

18 ha Yeyox te:

—Āxop te tikmũ'ũn xohix putuk, yā hāmyũmmũg 'ohnāg. Hāpxop te hāptopa' pip, tu tikmũ'ũn yīkox hā' mōxaha', tu kopa' pip. Yā hāpxop te kaxīy te tikmũ'ũn kummugā 'ohnāg.

19 Yā' kuxa hā' mōxa 'ohnāg, pa yā' tex hā' mōxaha', tu hāpxip 'ihā' mōg hāptopah. Kaxīy. Yā Yeyox te' xuktux, yā' max xit'ax xohix.

20 Yeyox te xe:

—Hāpxop 'ũm te tikmũ'ũn kummugāhā'? Hāpxop 'ũm te tikmũ'ũn kopa' pip, tu' mōxaha', tu' mōg hāptopah?

21 Yā' pip hāpxop kummuk tikmũ'ũn kuxa kopah, yā tikmũ'ũn te hāmp'e'paxex kummuk, nūy hāpxop kummuk mīy, yā' xupxet, tu tikmũ'ũn putex,

22 tu' nōy hā' xupxet, tu' xupkūmīy, tu hāpkummugā pax, yā' koit, tu hām'kute'ex pax, tu' yīpkumīy, tu' mǎnōg kummuk, tu yāy xexka pe'paxex, tup-tox kummuk.

23 Yā nōm xohix hāpxop kummuk te tikmū'ūn kopa' pip, tu' mōxaha', tu mōktu hāptopa' pip. Yā hāpxop te kaxīy te tikmū'ūn kummugāhā'. Kaxīy.

### *'Ūn puknōg*

24 Tu ta' mōg Yeyox, tu mōktu hāpxexka tu' mō'nāhā kōmēn Tinok yīkak, tu mīptut hā mō'nāhā', tu yāy xaptop putup, pa 'āmhok, yā tikmū'ūn xohix te' yūmmūg.

25 Ha ta' nūn 'ūhūn, hak-tok hex kopa' xip yāmīy kummuk. Yā tikmū'ūn te Yeyox 'āktux, ha 'ūn te' xupak, hu' nūn, tu nūktu' kopaxux hā' xip Yeyox yīkak.

26 Yā 'ūn puknōg, yā hāpxexka Xitpenīy yōg, tu Yeyox tu' xak, puyīy yāmīy kummuk xut 'ūk-tok hex kopah.

27 Ha Yeyox te:

—Tikmū'ūn tek-tok pu xit'ax hōm hāmāxap. 'Āp max'ah kaxop yōg xit'ax paha', tu kokex pu' hōm. Hā kaxīy Yoneo yōg hāpxop hōm hok puknōg xop pu'. Kaxīy.

28 Pa 'ūn te:

—Yāyā, hamūn, pa kokex kutok te mīmpe xit'ax kaka' pip, ha kaxop yōg pām yāgnāg xaha', ha' māhā'. Kaxīy.

29 Ha Yeyox te:

—Xate hām'āktux max. 'Āpu mōg yāy pet hah. Xip'ah yāmīy kummuk 'āk-tok kopah. Yā' mōg. Kaxīy.

30 Tu ta' mōg 'ūhūn yāy pet hah, tu nūktu' xupep, pa' xip 'ūk-tok hex, tu mīmpe mō'yōn'ax yīmū' pip, ha yāmīy kummuk xip'ah 'ūkopah.



*Tikyīpkox hok, tu hām'āktux yūmmūg 'ohnāg*

<sup>31</sup> Ha ta' xip Yeyox kōmēn Tinok yīkak, tu ta' mōg, tu kōmēn Xinōm hā' tep, tu Kōmēn te' 10 yōg hāpxexka tep, tu mōktu kōnāg xexka Ganinet tu' xupep.

<sup>32</sup> Ha ta' nūn tikmū'ūn, tu' nūnnāhā tihik, yā' yīpkox hok, tu hām'āktux yūmmūg 'ohnāg. Tikmū'ūn te Yeyox pu' xak, puyīy tik yīmū' yīm xex, puyīy hittupmā'.

<sup>33</sup> Ha ta' mōg Yeyox xix tihik tikmū'ūn xohix kūnāpah. Yeyox te yāy yīpkutok hā' nōy yīpkox 'āpit, tu' yīynīn, tu' yīkox hep hā' nōy yōyxōg 'āpit yāy yīpkutok yā,

<sup>34</sup> tu pexkox pēnāhā pepix, tu xit xut xexkah, tu: —“Epatah!” Kaxīy. Yā tikmū'ūn yīy'ax hā: “Pu yā 'āyīpkox xōn, nūy hām'āpax!” Kaxīy.

<sup>35</sup> Ha' yīpkox max, tu hām'āpak, ha' yōyxōg max, tu hām'āktux max.

<sup>36</sup> Ha Yeyox te tikmū'ūn xat puyīy nōm 'āktux hok. Yeyox te' xat punethok hā kaxīy, pa tikmū'ūn te nōm 'āktux punethok,

<sup>37</sup> ha tikmū'ūn te' xupak, tu' kuxa te' yēy, tu: —Tik te hāpxopmā max xe'ēgnāg! Tute tik yīpkox hok xupakgāhā', tu tik te hām'āktux yūmmūg 'ohnāg xat, puyīy hām'āktux! Kaxīy.

## 8

*Yeyox te tikmū'ūn te' 4,000 pu xit'ax popmāhā'*

<sup>1</sup> Hāpxip ha ta' yāy tu nū'nāhā tikmū'ūn xohix, tu yōg xit'ax pip'ah. Ha' xip Yeyox, tu yāy yōg tik te 12 xop xānāhā', tu:

2 –'Āte tikmũ'ũn kuxa ka', yã 'ãmnĩy tikoyuk hã' pip tikmũ'ũn 'ũgmũtik, ta hõnhã 'ũyõg xit'ax 'ũm pip'ah.

3 'Ūmã hok, ha 'ãte tikmũ'ũn mõ'pok 'ũpet hah, puxix xakux putat kopah, 'ũpu'uk tu'. Yã hãptox tu' nũn tikmũ'ũn. Kaxĩy.

4 Ha Yeyox yõg tik xop te:

–Tep-te tikmũ'ũn pu xit'ax hãmenex nũnte hãm panip xexka tu'? Yã' pip'ah xit'ax. Yã tikmũ'ũn xohix. Kaxĩy.

5 Ha Yeyox te:

–Pãm xohix texĩy 'õgnũ? Kaxĩy.

Ha:

–'Ūxohix te' 7. Kaxĩy.

6 Ha tikmũ'ũn xat, pu hãm tu' mãm, tu pãm te' 7 pop, tu Topa pu hãm'ãktux, hu:

–Xate 'ũgmũ'ã pãm popmãhã'. 'Āmax. Kaxĩy.

Yeyox te pãm koxip, tu yã yõg tik xop pu' popmãhã', puyĩy tikmũ'ũn pu popmã'.

7 Ha ta' pip mãhãm kamah, yã' xohix'ah, ha Yeyox te Topa pu mãm 'ãktux, tu yã yõg tik xop pu' popmãhã', puyĩy tikmũ'ũn pu' popmã',

8 ha tikmũ'ũn te' mãhã', tu mõktu xe xit putup'ah, yã puxix, ha Yeyox yõg tik xop te' xit'ax yãgnãg yãy tu nũ'xok manax te' 7 hã nũ'xip.

9 Yã tikmũ'ũn xohix te' 4.000 te' mãhã pãm xix mãhãm.

Ha ta tikmũ'ũn mõ'pok hatu'a Yeyox te',

10 tu ta' mõg yã yõg tik xop mũtik, tu mĩpkox hã' mõxaha', tu ta' mõg tu mõktu' mõxaha hãpxexka Namãnot tu'.

*Peniye xop te Yeyox tu'xak, puyīy hāpxopmā ka'ok xe'ēgnāg*

<sup>11</sup> Ha ta' nūn Paniye xop, tu Yeyox mūtik hām'āktux, tup-tup, puyīy Yeyox hām'āktux kum-muk, hu ta tu'xak, puyīy hāpxopmā ka'ok xe'ēgnāg, pu tikmū'ūn pēnā', puyīy tikmū'ūn yūmmūg Topa te Yeyox ka'ogāhā',

<sup>12</sup> ha Yeyox te xit xut xexka, tu:

—Teptu tikmū'ūn te hāpxopmā'ax ka'ok xe'ēgnāg xak, puyīy tikmū'ūn pēnā'. 'Āte xa hām'āktux, 'āte xa hāpxopmā ka'ok xe'ēgnāg putup'ah, xayīy pēnā'. Kaxīy.

<sup>13</sup> Tu ta' mōg Yeyox xix yāy yōg tik xop, tu mīpkox hā' mōxaha', tu ta' mōg, tu kōnāg xexka xak.

*Paniye xop yōg pām tokatokgā'ax xix 'Enot yōg*

<sup>14</sup> Ha Yeyox yōg tik xop yōg pām 'ūm xip'ah, yā' xaxok. Yā pām puxet xip mīpkox kopah,

<sup>15</sup> ha Yeyox te:

—Pa 'ātix. 'Ūkummuk Paniye xop yōg pām yōg tokatokgā'ax xix 'Enot yōg. Kaxīy.

Yā 'ap tokatokgā'ax 'āktux'ah, pa yā 'ūyōg hāmyūmmūgā'ax.

<sup>16</sup> Ha Yeyox yōg tik xop te yāy mūtik hām'āktux punethok, tu:

—Hamūn. Yūmū yōg pām 'ūm xip'ah, yīy ta nōm 'āktux. Kaxīy.

<sup>17</sup> Ha Yeyox te' xupak, tu:

—Teptu yāy mūtik hām'āktux pām 'ūm xip'ah? 'Ok 'āxop te' yūmmūg 'ohnāg yōgnū hām'āktux? Texīy 'āp-tox ka'ok?

<sup>18</sup> 'Āpa te hāmpēnā 'ohnāg, xix 'āyīpkox te hām'āpak 'ohnāg. 'Ok 'ūxutigāhā

19 'âte pãm te' 5 koxip, nũy tikmũ'ũn te' 5.000 pu' popmã'? 'Ûmã kux, ha pãm yãgnãg xe' pip, manax hã nũ'xip. 'Ãxop te manax xohix texĩy pop? Kaxĩy.

Ha':

—12. Kaxĩy.

20 Ha Yeyox te xe:

—'Ãte pãm te' 7 koxip, nũy tikmũ'ũn te' 4.000 pu' popmã'. 'Ûmã kux, ha pãm yãgnãg xe' pip, manax hã nũ'xip. 'Ãxop te manax xohix texĩy pop? Kaxĩy.

Ha':

—7. Kaxĩy.

21 Ha Yeyox te:

—'Ok 'ãxop te hãmyũmmũg nõmhã'? Kaxĩy.

*Yeyox xix tik pa hok Metxax tu'*

22 Tu ta' mõg Yeyox xix yãy yõg tik xop, tu mõktu' mõxaha xiptuxexka Metxax tu', ha ta' nũn tikmũ'ũn, tu tik pa hok nũnnãhã', tu Yeyox tu' xak, puyĩy 'ũyĩm xex tik yĩmũ', nũy hittupmã'.

23 Ha Yeyox te' nõy yĩm mũg, tu ta' mõg tik mũtik tikmũ'ũn xohix kũnãpa', tu yĩy pu'ĩn tik pa kopah, tu nõy yĩmũ yãy yĩm xex, tu:

—'Ok hãpxop pẽnãhã'? Kaxĩy.

24 Ha tik te hãmpẽnãhã', tu:

—'Ãte' pẽnãhã tihik, pa yã mĩm te hãpkumep putuk. Kaxĩy.

25 Ha Yeyox te xe yãy yĩm xex tik pa yĩmũ', ha tik te hãmpẽnã mõ'ka'ok, tu hãmpẽnã max xe'ẽgnãg. Yã' hittup.

26 Ha Yeyox te tik xat, pu' pet ha mõg, puyĩy xiptuxexka tu mõg hok.

*Pet te hãm'ãktux max*

27 Tu ta' mōg Yeyox xix yāy yōg tik xop tu xiptux-exka Pinip yōg Xeyanet tu'.

Yeyox te tik pu hām'āktux, hu:

—Putep xuktux tikmū'ūn? 'Ū'ūm 'ūgmūn? Kaxīy.

28 Ha tik te:

—Yā' yāg te: “Yā Yoām, nōm tep-tox pix.” Kaxīy. Ha ta' yāg nōy te: “Yā 'Enit.” Kaxīy. Ha ta' yāg nōy te: “Yā nōm te Topa pupi hām'āktux.” Kaxīy.

29 Ha Yeyox te:

—Xix 'āxop, putep xuktux 'āxop, 'ū'ūm 'ūgmūn? Kaxīy.

Ha Pet te:

—Yā Topa te 'āyāyikutnāhā'. Kaxīy.

30 Ha Yeyox te tik xat, puyīy nōm 'āktux hok.

*Yeyox te' xuktux 'ūxok putup, tu putpu' hip-tup*

31 Tu ta hām'āktux Yeyox te yāy yōg tik xop pu, tu:

—'Ūgmūn, yā Tikmū'ūn Kutok, tuk xūy xexkap-tup, yā Yoneo xop yōg xexka xop tek putup nōg putup, xix 'āmānex xexka xop te', xix tik te hāmyūmmūg xop te', tu' nōy xat putup, puyīy 'ūkputex. 'Ūkxok xe'e putup, pa 'āmnīy tikoyuk nōg, 'īhā putpuk hip-tup. Kaxīy.

32 Yā hām'āktux xe'e Yeyox te', ha Pet te:

—'Āmhok. Kaxīy hok! Kaxīy.

33 Ha Yeyox yōkānām, nūy yāy yōg tik xop pēnā', nūy Pet pu hām'āktux, hu:

—'Ōg hām'āktux'ax yā Hāmgāyāgnāg yōg. 'Āpu 'ūkxāmpa mōg! Xate hāmpē'āpaxex, yā tikmū'ūn te hāmpē'paxex putuk, yā 'ap Topa te hāmpē'paxex putuk'ah. Kaxīy.

34 Tu ta tikmū'ūn xānāhā Yeyox te, xix yāy yōg tik xop xānāhā', ha' nūn, ha Yeyox te:

—Tikmũ'ũn tek mũn mũtik hāpkumep putup, puxix yāy kutōgnāg pe'paxex, puxix yāy yōg putup'ax mīy 'ohnāg, nūy 'āmnīy xohix hā' yāy yōg mīpkupnix tat, nūy xūy, nūy 'ūkxūy putuk, tuk mũn mũtik hāpkumep putup nōmhā'.

<sup>35</sup> Ha tikmũ'ũn te' yāy xaxok hok, puxix tu' hi xe'e 'ohnāg, pa tikmũ'ũn xok 'ūgmũn hah, puxix tu hip-tup mōkuma' mōg, tu hi kux 'ohnāg.

<sup>36</sup> Teptu hām xexka yōg hāpxop xohix pop, pāyā' xok? 'Ūp-texop, tu' xok, tu hāpxop xohix xaxok, 'ūxok tu', puxix' hok xe'ēgnāg.

<sup>37</sup> 'Ok max, pu tikmũ'ũn putexop xexkah, tu hām xexka yōg tayūmak xohix xexka pop, pa' xok? 'A' max'ah. Yā' xok, tu tayūmak xohix xaxok, tu hok xe'ēgnāg, ha tayūmak xohix te tikmũ'ũn putpu' hīnnā hok.

<sup>38</sup> Tikmũ'ũn tek mũn hā yāyhāhup, xix yōgnū hām'āktux ha yāyhāhup, yā 'ūnōy xop pu yāyhāhup, hu: “Agmũn Yeyox yōg'ah.” Kaxīy. Koxix 'āte nōm hā yāyhāhup, 'ūyānān tu'. 'Ātak Topa pu 'āte nōm xop hā yāyhāhup, 'īhāg nūn, tu: “Ōhōm 'a' yōg'ah.” Kaxīy. 'Īhāg xexka xe'ēgnāg nūn 'ātak Topa putuk, xix pexkox yōg nū'pok xop putuk.

## 9

<sup>1</sup> Tu ta xe hām'āktux Yeyox te, hu:

—'Āte xa hām'āktux, yā' pip tikmũ'ũn nūnteh, tu xakix hāmāxap'ah, pa' pēnāp-tup hāmāxap Topa te yāy yōg tikmũ'ũn xat xe'e putup, ha' yīpkox pip putup. Kaxīy.

*Yeyox, xix Mōyyex, xix 'Enit*

<sup>2</sup> Ta 'āmnīy xohix te' 6 nōg, 'īhā' mōg Yeyox, tu Pet mōgāhā', xix Tiak, xix Yoām, tu' nōy mōgā 'ohnāg, tu' mōg yīktix tox tu', tu' mōxaha', ha' xip Yeyox tik keppah, tu yāyhā kuyānām putuk,

<sup>3</sup> ha' topixxax yāyhā 'ūmnok tūmnāg, tu yōg kuyānām pip. Yā tikmū'ūn te topixxax pix hā kaxīy yūmmūg 'ohnāg.

<sup>4</sup> Ha tik tikoyuk te' pēnāhā 'Enit te Yeyox mūtik hām'āktux, xix Mōyyex te',

<sup>5</sup> ha Pet te Yeyox pu hām'āktux, hu:

—Yāyā, yā' max yūmūg pip nūnteh. 'Ūgmū'āte xa' mīy putup 'āpetnāg, yā 'ōgnū', xix Mōyyex yōg, xix 'Enit yōg. Kaxīy.

<sup>6</sup> Yā' kuxa nōg tihik, yīy hām'āktux hitop Pet te'.

<sup>7</sup> Hāpxip 'īhā' nūn hāmgōy xexkah, nūktu kūyānām mō'nīy, ha Topa te hām'āktux hāmgōy xexka kopah, hu:

—Yā 'ūgkutok pit nō'ōm. 'Āte mō'yāy xe'ēgnāg. 'Āpu 'ūyōg hām'āktux 'āpax! Kaxīy.

<sup>8</sup> Ha tik te yāy yīmap pēnāhā mō'ka'ok, pa Yeyox puxet pēnāhā'. Yā' nōy pip'ah.

<sup>9</sup> Tu ta yīktix hā kukpa yīxohoh Yeyox xix tihik, ha Yeyox te:

—'Āpu hāmpēnā'ax 'āktux hok. Nāy. 'Ūgmūn Tikmū'ūn Kutok te putpuk hip-tup, ha nōmhā nōm 'āktux putup. Kaxīy.

<sup>10</sup> Ha tik te nōm 'āktux 'ohnāg, pa yāy yīkopit, hu:

—Putep xuktux 'ūputpu' hip-tup? Kaxīy.

<sup>11</sup> Tu Yeyox pu yīkopit, hu:

—Teptu tik te hāmyūmmūg xop te hām'āktux 'Enit nūn putup hāmāxap? Kaxīy.

<sup>12</sup> Ha Yeyox te:

—Hamūn, 'Enit nūn hāmāxap, nūy hāmmaxnā'. Pa Topa tappet tu hām'āktux 'ūgmūn Tikmū'ūn Kutok xūy putup, ha tikmū'ūn tek putup nōg putup,

<sup>13</sup> pa 'āte xa hām'āktux, hōmā yā' nūn 'Enit nūnteh, ha tikmū'ūn te' kute'ex kummuk pax. Yā hōmā Topa tappet tu hām'āktux, hu:

—Tikmū'ūn te 'Enit kute'ex kummuk putup. Kaxīy.

*Yeyox te kakxop hittupmāhā'*

<sup>14</sup> Ūpip Yeyox yōg tik xop, tu tik te hāmyūmmūg xop mūtik hām'āktux,

<sup>15</sup> ha tikmū'ūn xohix pip 'ūyīmap, tu Yeyox pēnāhā', hu' nūn, nūy Yeyox mūtik hām'āktux.

<sup>16</sup> Ha Yeyox te yāy yōg tik xop pu hām'āktux, hu:

—Putep 'āktux 'āxop yāy mūtik? Kaxīy.

<sup>17</sup> Ha ta' xip tihik tikmū'ūn kopah, tu:

—Notot, 'āte yāy kutok pit nūnnāhā', yā' kopa' xip yāmīy kummuk, ha 'ūgkutok te hām'āktux yūmmūg 'ohnāg.

<sup>18</sup> Yāmīy kūmmuk te' mūkpaax, tu hām tu mō'yōnpax, ha' yīkox hā' konnoppax, tu' xox hā' nōy nahatpax, hu' pu'uk 'ūgkutok. Ha 'āte yāy kutok nūnnāhā, puyīy 'ōgnū tik xop yāmīy kummuk xut, pa' xut yūmmūg 'ohnāg. Kaxīy.

<sup>19</sup> Ha Yeyox te:

—Yā tik kuxa mām kutōgnāg 'ūgkopah! 'Āmnīy xohix texīy hāg nox xip'ax 'āxop mūtik, xayīy 'ākuxa mām? Āmnīy xohix texīy hā 'āte 'ōg hāpkummuk hā tot putup? 'Āpu' nūnnā 'āk-tok. Kaxīy.

<sup>20</sup> Yā' nūnnāhā', ha yāmīy kummuk te Yeyox pēnāhā', tu kakxop yāy nuhugā ka'ok, ha' nāhā', tu' yōkanām nā' mōg, tu' yīkox hā konnop.



21 Ha Yeyox te 'ātak pu hām'āktux, hu:

—Hāmyāxatamuk xohix texīy hā' kummuk hā kaxīy? Kaxīy.

Ha 'ātak te:

—Yā hōmā yā' pu'ūgnāg xix hōnhā'.

22 Yā yāmīy kummuk te mō nōy yōn punethok kuxap kopah, xix kōnāg kopah, nūy putex. Xate hāpxopmā yūmmūg, hu tak mū'ā teh. 'Āpu 'ūgmūg kuxa ka'. Kaxīy.

23 Ha Yeyox te:

—'Ok 'āte xa hāpxopmā yūmmūg? 'Ok 'ākuxa yūm ka'ok? Yā 'āte' kuxa mām ka'ok xop pu hāpxopmā xohix yūmmūg. Kaxīy.

24 Ha hām'āktux ka'ok, hu:

—Yā 'ūgkuxa yūm 'ākopah. 'Āpu 'ūgka'ogā', 'ūyīy 'ūgkuxa yūm ka'ok punethok. Kaxīy.

25 Ha tikmū'ūn xohix yīnnāhā' tu' nūn, ha Yeyox te yāmīy kummuk xat, hu:

Yāmīy kummuk, xate' nōy yīpkox hogāhā'. Yāmīy kummuk, 'āpep, nūy putpu mōnā hok. Kaxīy.

26 Ha yāmīy kummuk te hām'āktux ka'ok, tu kaxxop yāy nuhugā xexkah, tu ta' mōg, ha ta' pip kaxxop, ha tikmū'ūn te:

—Yā' xok. Kaxīy.

27 Pa Yeyox te' nōy yīm hā' mūg, tu' yīm xīnnāhā', hak-nīhā' xip.

28 Ha ta' mōg Yeyox, tu mōktu mīptut hā mō'nāhā', ha Yeyox yōg tik xop te:

—Teptuk mū'āte yāmīy kummuk xut yūmmūg 'ohnāg?

29 Ha:

—Tikmū'ūn te Topa pu hām'āktux. Hā kaxīy nōm yāmīy kummuk xut. Kaxīy.

*Yeyox te xe hãm'ãktux 'ûxok putup, tu putpu' hip-tup*

<sup>30</sup> Tu ta' mōg Yeyox yāy yōg tik xop mūtik, tu mōktu hāpxexka Ganinet tu hāpkumep. Yeyox te yāy xaptop putup, puyīy tikmũ'ûn pēnã hok,

<sup>31</sup> yā yāy yōg tik xop pu hāmyũmmũgãhã', tu:

—Tik te' gāy xop mōgãp-tup, puyīy 'ũgmũy, nūy 'ûkputex, yã Tikmũ'ûn Kutok putex, hak xok putup, pa 'ãmñy tikoyuk nōg 'ihã putpuk hip-tup. Kaxīy.

<sup>32</sup> Pa tik te Yeyox yōg hãm'ãktux yũmmũg 'ohnãg, pa' kuxa nōg, hu xe yīkopit 'ohnãg.

*Tik 'ũm xexkanãm*

<sup>33</sup> Ta' mōg Yeyox yāy yōg tik xop mūtik, tu mōktu kōmēn Kapãnãm tu' mōxaha', tu mĩptut hã' mōxaha'. Yeyox te tik te 12 xop pu hãm'ãktux, hu:

—'Ãxop te putep yāy mūtik hãm'ãktux putat kopah? Kaxīy.

<sup>34</sup> Pa yã' yēy. Yã tik te hãm'ãktux, hu:

—Tik 'ũm xexkanãm Yeyox yōg tik xop kopah? Kaxīy.

<sup>35</sup> Yeyox yũm, tu' xãnãhã yāy yōg tik xop, ha' nũn, ha:

—'Ok xatep-tup, xayīy xexkah? 'Ãpu yāy kutōgnãg pe'ãpaxeh, nūy nōy pu 'ãhãm, yã' xohix yōg kãmãnat. Kaxīy.

<sup>36</sup> Yeyox te kaxxop paha', tu tik xop kopa' xix, tu' nōy yĩmũ' yĩm xex, tu:

<sup>37</sup> —Tikmũ'ûn 'ũm te kaxxop te kaxīy putup, nūy kaxxop pēnã', 'ûkputuppax tu'. Yã nōm tek putup kamah. Tikmũ'ûn 'ũm tek putup, yã Topap-tup kamah, yã nōm te nũgkutnãhã'. Kaxīy.

*Tikmũ'ün te yũmũg hã' gãy 'ohnãg, puxix yũmũg hã xape'*

<sup>38</sup> Ha Yoãm te:

—Yãyã', 'Ûgmũ'ãte' pẽnãhã tihik, ha yãmĩy kummuk mõi. Tute:

“Yeyox te 'ã yãy 'ãxet'ax hõm, 'ũyĩy yãmĩy kummuk mõi. Yãmĩy kummuk, 'ãpep!” Kaxĩy.

Hak mũ'ãte:

“Ãmhok! 'Ûmõi hok!” Kaxĩy.

Yã tik xip'ah 'ũgmũg xop kopah. Kaxĩy.

<sup>39</sup> Ha Yeyox te:

—Kaxĩy hok. Yã' max. 'Ãte yãy 'ãxet'ax hõm, puyĩy yãmĩy kummuk mõi, puxix tik 'ũgmũn 'ãktux kummuk putup'ah.

<sup>40</sup> Yã yũmũg hã' gãy 'ohnãg, puxix yũmũg hã xape tikmũ'ün.

<sup>41</sup> 'Äpu 'ũxaxok hok, tikmũ'ün te xa kõnãg tat, 'ũkuxa mãm 'ũgkopah tu', puxix Topa nõm hã maxnã'. Kaxĩy.

*Pa 'ãtix. Hãpkummuk mõi hok*

<sup>42</sup> Tu xe:

—Tikmũ'ün 'ũm te' kuxyãhã kakxop kutõgnãg kuxa yũm'ax 'ũgkopah. Yã' max, pu nõm kummuk xop xuknĩkup tu mĩkaxxap xexka hĩy poxit hã, nõy kõnãg xexka kopa mõ'yõn.

<sup>43</sup> Paxpu 'ãyĩm te 'ãkummugã', xayĩy hãpkummuk mõi, 'ãpu kuyut, nõy 'ũxak, nõy putyõn. Yã' max, pexkox hã mõnãy 'ãyĩm puxet hã. Pa' kummuk, 'ũnõi te 'ãxix kuxap kopah, ha 'ãyĩm tix pip. Yã kuxap xok 'ohnãg.

<sup>44</sup> Yã 'ũk-tox nõy nã' mõi putup hãpxop xohix, ha kuxap xok 'ohnãg.

<sup>45</sup> Paxpu 'āpata te 'ākummugā, xayīy hāpkummuk mīy, 'āpu kuyut, nūy 'ūxak, nūy putyōn. Yā' max, pexkox hā mōnāy 'āpata puxet hā. Pa' kummuk, 'ūnōy te 'āxix kuxap kopah, ha 'āpata tix pip.

<sup>46</sup> Yā 'ūk-tox nōy nā' mōg putup hāpxop xohix, ha kuxap xok 'ohnāg.

<sup>47</sup> Paxpu 'āpa te 'ākummugā, xayīy hāpkummuk mīy, 'āpu 'ūxut, nūy putyōn. Yā' max, Topa yōg xop hā mōnāy 'āpa puxet hā. Pa' kummuk, 'ūnōy te 'āxix kuxap kopah, ha 'āpa tix pip.

<sup>48</sup> Yā 'ūk-tox nōy nā' mōg putup hāpxop xohix, ha kuxap xok 'ohnāg.

<sup>49</sup> Kuxap te pipkup kopit, pe' max pe' kummuk. Hā kaxīy Topa te tikmū'ūn yōg hāpxopmā'ax kopit putup.

<sup>50</sup> Tikmū'ūn te' putyōn 'āmotxuxpex kummuk. Hā kaxīy Topa te hāpkummuk mīy xop putyōn putup. Pa 'āpu hāmmax mīy, nūy tikmū'ūn pu hāmmaxnā'. Kaxīy.

## 10

### *'Ok 'īpxox te' xetut nīm, pu' kummuk*

<sup>1</sup> Tu ta' mōg Yeyox hāpxexka Yonex tu', tu kōnāg kox Yohnām xak. Ha ta' yāy tu nū'nāhā tikmū'ūn xohix Yeyox yīmāp 'ūxehet, ha xe tikmū'ūn pu hāmyūmmūgāhā'. Yā Yeyox te hāmyūmmūgā pax.

<sup>2</sup> Ha ta' nūn Paniye xop, tup-tup, puyīy Yeyox koit, tu:

—Putep kax'āmi yūmū yōg xat'ax yōg tappet tu? Topa te putep xat? 'Ok xat, pu tik xetut nīm? Kaxīy.

<sup>3</sup> Ha Yeyox te:

—Mōyyex te putep xat? Kaxīy.

<sup>4</sup> Ha:

—Mõyyex te' xat, pu tik tappet kax'ãmi, nũy xetut nĩm, puyĩy xetut mõg. Kaxĩy.

<sup>5</sup> Ha Yeyox te:

—Hamũn. Hõmã tikmũ'ũn yĩpkox 'ohnãg, yĩy' xat'ax te kaxĩy kax'ãmi'.

<sup>6</sup> Pa 'ãmhok. Hõmã Topa te' mĩy hãhãm xix hãpxop xohix, 'ihã Topa yõg tappet te: “Topa te' mĩy tihik xix 'ũhũn,

<sup>7</sup> yĩy ta tik te' tak nĩm xi' tut, nũy xetut mũtik yãytax,

<sup>8</sup> ha nõmhãp-xet. Yã' tix'ah 'ĩpxox xix xetut, yãp-xet.

<sup>9</sup> Yã Topa te yãytagãhã', ha tikmũ'ũn te nõm nĩmmãhã', pu' kummuk. Kaxĩy.

<sup>10</sup> Ta' mõg Yeyox xix yãy yõg xop, tu nũktu mĩptut hã' mõxaha', ha Yeyox yõg tik xop te:

—Putep xuktux hato'ah? Kaxĩy.

<sup>11</sup> Ha Yeyox te:

—'ĩpxox te' xetut nĩm, nũy nõy mũy, yã hãpkummuk mĩy. Yã' nõy hã' xupxet.

<sup>12</sup> Ha ta' xetut te 'ĩpxox nĩm, nũy nõy mũy, hã hãpkummuk mĩy. Yã' nõy hã' xupxet. Kaxĩy.

### *Yeyox xix kaxxop*

<sup>13</sup> Hãpxip 'ihã tikmũ'ũn te kaxxop nũnnãhã Yeyox tu', puyĩy Yeyox kakop pu hãmmaxnã', pa Yeyox yõg tik xop te:

—'Ãmhok, 'ũnũnnã hok. Kaxĩy.

<sup>14</sup> Pa Yeyox te' xupak, tup-tup nõg, tu:

—'Ûtux, puk ha nũ' kaxxop. Hãm'ãktux hok, hu: “'Ûnũnnã hok.” Kaxĩy. Yã Topa te yãy yõg tikmũ'ũn xat, ha' yĩpkox pip. Yã nõm xop te kaxxop putuk.

15 'Āte xa hāpxe'e 'āktux: Kaxxop yīpkox pip Topa xat'ax pu', ha Topa tep-tup, pu tikmũ'ũn yīpkox pip kamah, kaxxop putuk, nũy Topa yōg tikmũ'ũn kopa' pi'. Kaxīy.

16 Yeyox te kaxxop yīmũ' yīm xex, tu kaxxop pu hāmmxnāhā'.

*Tik 'ũp-texop xexka'*

17 Tu ta xe' mōg Yeyox, tu' mōg kutōgnāg, ha ta nũ'xupaha tihik, tu nũktu Yeyox keppa' kopaxux hā' xip, tu:

—Notot max, 'āte putep mũn mĩy putup, nũy hi xe'ēgnāg mōkumakmōg, hā' kux 'ohnāg? Kaxīy.

18 Ha Yeyox te

—Teptu xate: “Notot max”? Kaxīy. Yā Topa 'ũmax, yāp-xet 'ũmax, ha ta' nōy max 'ohnāg.

19 Xate' yūmmũg Topa te' xat, hu: “Tikmũ'ũn putex hok, 'ānōy hā xupxet hok, hām xupxet hok, 'ānōy hā kupex kummuk hok, koit hok, 'ōg 'ātak tu 'āyīpkox pi' xix 'ātut tu'.” Kaxīy.

20 Ha tik te:

—Notot, 'āte' mĩy xohix. Yā hōmā 'ūgmũn yā kaxxop xix hōnhā hā' mĩy xohix. Kaxīy.

21 Ha Yeyox te tik pēnāhā', tu mō'yāy xe'ēgnāg, tu:

—Xate hāpxopmā'ax puxet xip'ax hok. Mōg, nũy 'ōg hāpxop xohix hāmenex, nũy tayūmak pop, nũy 'ūhok xop pu' nīm, nũy pi' 'ōg hāpxop max xe'ēgnāg pexkox kopah, nũy nũ', nũy 'ūkpe mōg. Kaxīy.

22 Yā tik te hām'āktux 'āpak, tu' yēy, tu' kuxa hittup 'ohnāg, tu ta' mōg nũpeheh. Yā 'ũp-texop xexkānām.

23 Ha Yeyox te yāy yōg tik xop te' yīmap pēnāhā', tu:

—Yā 'ūp-texop xexka kutīgnāg te Topa yōg putat hā' mōg, Topa yōg xat'ax pu' yīpkox pip hok tu'. Kaxīy.

<sup>24</sup> Ha Yeyox yōg tik xop te' yēy, ha Yeyox te:

—'Ūgnix mūnōm xop, yā tikmū'ūn kutīgnāg te Topa yōg putat hā' mōg, nūy Topa yōg xat'ax pu' yīpkox pi'. Yā hāpxopmā ka'ok.

<sup>25</sup> Xok xexka kāmēn te 'āmuxnāg ta kup kox hā mō'tat hok, ha tap-texop xexka xop te Topa yōg putat hā mōg 'ohnāg, tu Topa yōg xat'ax pu' yīpkox pip 'ohnāg.

<sup>26</sup> Ha Yeyox yōg tik xop kuxa te' yēy, tu yāy mūtik hām'āktux, hu:

—'Ok Topa te tikmū'ūn kuxa kummuk xit 'ohnāg? Kaxīy.

<sup>27</sup> Ha Yeyox te' nōy pēnāhā, tu:

—Hamūn, Topa tep-texop xexka xop kuxa kummuk xit yūmmūg, nūy kuxa max mō'tat 'ūyānān tu', pa yā tikmū'ūn te kuxa kummuk xit yūmmūg 'ohnāg. Kaxīy.

<sup>28</sup> Ha Pet te:

—Xate' yūmmūg, 'ūgmū'āte yāy yōg hāpxop xohix nīm, nūy 'āpek mūg mōg. Kaxīy.

<sup>29</sup> Ha Yeyox te:

—'Āte xa hāpxe'e 'āktux, tikmū'ūn te' yāy pet nīm, nūy 'ūkpe mōg, pe' taknōy nīm, pe' pit, pe' tutnōy, pe' hex, pe' tut, pe' tak, pek-tok, nūy 'ūkpe mōg, nūy 'ūkpupi hāpxopmā', nūy Topa yōg hām'āpak max'ax 'āktux.

<sup>30</sup> Ha Topa te nōm pu popmāp-tup nūnte hām xexka tu', yā' popmāp-tup 'ūpet xohix te' 100, xi' taknōy 100, xi' pit 100, xi' tutnōy 100, xi' hex 100, xi' tut 100, xik-tok 100, xix hām te' 100, ha tikmū'ūn

te nōm kute'ex kummuk xexkap-tup. Hāpxip 'īhā Topa te nōm hīnnāp-tup, puyīy hī xe'ēgnāg mōkuma' mōg, ha' kux 'ohnāg.

<sup>31</sup> Yā tikmū'ūn te māxap yāyhā ka'ax putup, ha ta ka'ax xop yāyhā māxap putup. Kaxīy.

*Yeyox te xe hām'āktux 'ūxok putup, tu putpu' hip-tup*

<sup>32</sup> Tu ta' mōg Yeyox xix yāy yōg tik xop, tu putat hā' mōg kōmēn Yenoyanēn tu', ha Yeyox yōg tik xop te Yeyox pe' mōg, ha tikmū'ūn te' pe' mōg kamah, ha Yeyox yōg tik xop kuxa te' yēy, ha tikmū'ūn kuxa nōg, ha Yeyox te yāy yōg tik xop mōgāhā', tu tikmū'ūn nīm, tu:

<sup>33</sup> —'Ūyūmmūg? Yūmūg mōg kōmēn Yenoyanēn tu', ha ta 'ōnte tik te 'āmānex xexka xop mōgāp-tup xix tik te hāmyūmmūg xop mōgāp-tup, puyīy 'ūgmūn Tikmū'ūn Kutok mūy, tu hām'āktux putup, hu:

—'Āpu 'ūp-tex! Kaxīy.

Tu puknōg xop puk hōm putup,

<sup>34</sup> hak mūn 'āktux kummuk putup, tu' yīy'pū'īn putup, tuk kix putup, tuk putex putup, hak xok putup. Pa 'āmnīy tikoyuk nōg putup, 'īhā putpuk hip-tup. Kaxīy.

*Tiak tep-tup hāpxop xix Yoām te'*

<sup>35</sup> Hāpxip 'īhā' nūn Yemeneo kutok Tiak xix Yoām, nūktu Yeyox pu hām'āktux, hu:

—Yāyā, 'ūgmū'āteputup, xayīy hāpxopmā'. Kaxīy.

<sup>36</sup> Ha Yeyox te:

—Putep putup? Kaxīy.

<sup>37</sup> Ha:



—Hāpxip 'īhā 'āyūm putup 'ūxexka yōg mīmpe yūm'ax xe'ēgnāg yīmū', nūy yāy yōg tikmū'ūn xat. 'Āpuk mūg xat, 'ū mām yāpxet 'āyīm xe'e ha xi' nōy 'āyīm xax ha 'ōnteh. Kaxīy.

<sup>38</sup> Ha Yeyox te:

—'Āxop te' yūmmūg 'ohnāg 'āxop te nōm putup. Hāpxip 'īhā tikmū'ūn tek xūygāp-tup, tuk kute'ex kūmmuk putup, tup-tex putup. 'Ok 'āxop te' xūy hā kaxīy tot kamah? Kaxīy.

<sup>39</sup> Ha:

—Yā hamūn. Kaxīy.

Ha Yeyox te:

—Yā hamūn. Tikmū'ūn te 'āxop xūygāp-tup, tu 'āxop kute'ex kummuk putup, tu 'āxop kix putup,  
<sup>40</sup> pa 'a 'āte' xat'ah, pa Topa te' xat, pu tikmū'ūn mām 'ūgyīm xe'e ha xix 'ūgyīm xax hah, yā 'ūnōy yōg xip'ax. Kaxīy.

<sup>41</sup> Ha ta' xupak Yeyox yōg tik te 10 te', hu' gāy.

<sup>42</sup> Ha Yeyox te yāy yōg tik xohix xānāhā', yīy ta' nūn. Yeyox te:

—'Āxop te' yūmmūg, 'ūxat'ax xop te' xat pax 'ūkuxa mām kūnāpa pip xop.

<sup>43</sup> Pa 'āxop kopa hā kaxīy yā' kummuk. 'Āpu Topa kopa kuxa mām xop xat pax hok. 'Ok xatep-tup, xayīy 'āxexka'? 'Āpu tikmū'ūn pu hāpxopmā max, yā tikmū'ūn yōg kāmānat max putuk.

<sup>44</sup> 'Ok xatep-tup, xayīy 'āxexka'? 'Āpu tikmū'ūn xohix yōg kāmānat putuk.

<sup>45</sup> Yā 'ūgmūn Tikmū'ūn Kutok nūn nūnte hām xexka tu', nūy tikmū'ūn pu hāpxopmā max, yā tikmū'ūn yōg kāmānat putuk. 'Ūgnūn, nūy tikmū'ūn pupik xok, nūy tikmū'ūn xohix kuxa

kummuk xit, nũy kuxa max mō'tat, 'ũyānān tu'.  
Kaxĩy.

*Yeyox xix Matimẽo yā pa hok*

<sup>46</sup> Tu ta' nũn Yeyox xix yāy yōg tik xop, tu nũktu' mōxaha kōmēn Yenikot tu'. 'Ũpip kōmēn tu', tu ta' mōg kōmēn kũnāpa', ha ta' mōg tikmũ'ũn xohix kamah, pa' xip tihik, yā pa hok, yā' xuxet'ax Matimẽo, yā Timeo kutok. Tik yũm putat pukah, tu tayũmak xak, puyĩy tikmũ'ũn tayũmak nĩm.

<sup>47</sup> Ha tikmũ'ũn te hām'āktux Yeyox te kōmēn Nāyane tu' nũn, ha Matimẽo te' xupak, tu hām'āktux ka'ok, hu:

—Yeyox, yā Namix mōkputox, 'āpu 'ũgmũn kuxa ka'! Kaxĩy.

<sup>48</sup> Ha tikmũ'ũn te:

—'Āyĩy hok! Kaxĩy.

Pa tik yĩy ka'ok nōy nā' mōg, hu:

—Namix mōkputox, 'āpu 'ũgmũn kuxa ka'! Kaxĩy.

<sup>49</sup> Ha Yeyox hup, tu:

—'Āpu tik pa hok nũnnā'. Kaxĩy.

Ha tikmũ'ũn te tik pu hām'āktux, hu:

—'Ākuxa nōg hok. 'Āpu 'āyok. Tute 'āxānāhā', xa nũ'! Kaxĩy.

<sup>50</sup> Ha Matimẽo te yāy kayak putxok, tu pepi' xip, tu ta' mōg Yeyox hah, tu mōktu' xupep.

<sup>51</sup> Ha Yeyox te:

—Putep putup, 'ũ mĩy? Kaxĩy.

Ha:

—Notot, 'ātep-tup, 'ũyĩy hāmpēnā 'ũxeheh. Kaxĩy.

<sup>52</sup> Ha Yeyox te:

—Mōg! 'Āpa hittup, 'ākuxa yũm ka'ok 'ũgkopa hah. Kaxĩy.

Hāpxip 'ohnāg 'ihā Matimēo te xe hāmpēnāhā', tu ta' mōg Yeyox peheh.

## 11

### *Yeyox te kōmēn Yenoyanēn tu' nūn*

<sup>1</sup> Ta xe' nūn Yeyox xix yāy yōg tik xop, tu nūktu kōmēn Yenoyanēn yīka' pip yīktix 'Onimet Kup tu' xiptuxexka Metpaye yīka' xix xiptuxexka Metān yīka'. Ha Yeyox te yāy yōg xop xat,

<sup>2</sup> hu:

—Mōg xiptuxexka tu'. Xiptuxexka tu 'āmōxap-tup, pa' xip putup yomēnnāg, yā' hīy, yā tikmū'ūn te nōm yīmū' yūm 'ohnāg. 'Āpu 'ūko'a', nūy nūnnā'.

<sup>3</sup> Ka tikmū'ūn te: “Teptu 'ūmōgāhā?” Kaxīy. Ha 'āxop te hām'āktux putup, hu: “Yā 'ūgmūg xuxyā tep-tup. Hāpxip 'ihā' nūnnāp-tup 'ūgmū'āte!” Kaxīy.

<sup>4</sup> Ha ta' mōg, pa' xip yomēnnāg, 'ūhīy hāmyīkox yīka'. Tik te' ko'a',

<sup>5</sup> ha ta' nūn tikmū'ūn, tu:

—Teptu yomēn ko'a'? Kaxīy.

<sup>6</sup> Ha tik te:

—Yā 'ūgmūg xuxyā tep-tup. Hāpxip 'ihā' nūnnāp-tup 'ūgmū'āte'. Kaxīy.

Ha tikmū'ūn te:

—'Āpu yomēnnāg mōgā'. Kaxīy.

<sup>7</sup> Ha ta' mōg tihik, tu yomēnnāg nūnnāhā Yeyox tu', tu yāy yōg kayak xex yomēnnāg yīmū', ha Yeyox te nōm yīmū' yūm.

<sup>8</sup> Ha ta' tikmū'ūn xohix te putat yīmū yāy yōg kayak xatat ha' mōg, ha ta' tikmū'ūn xohix nōy te mīm tu' mep mīmmāg, tu nōm putat yīmū' xatat ha' mōg.

<sup>9</sup> Ha ta' mōg tikmũ'ũn Yeyox keppah, ha ta' mōg tikmũ'ũn nōy Yeyox peheh. 'Ūxohix te hām'āktux ka'ok, hu:

—Yā' max xe'ēgnāg Topah! Topa te nũ'ākutnāhā', tu 'āka'ogāhā'!

<sup>10</sup> Yā' max xe'ēgnāg, xate yāy yōg tikmũ'ũn xat kōnāmāhā', hā yīpkox pip. Xate mōnāyxop Namix putuk, yā tikmũ'ũn xat putup. Yā' max xe'ēgnāg Topah! Kaxīy.

<sup>11</sup> 'Ūnũn Yeyox, tu nũktu' xupep kōmēn Yenoyanēn tu', tu ta' mōg, tu mōktu Topa pet xexka hā mō'nāhā', tu hāpxop xohix yīmap pēnāhā'. 'Āmāxak'ax ha ta' mōg Yeyox xix yāy yōg tik te 12 xop, tu nũktu xiptuxexka Metān hā' moxaha'.

### *Piget kup*

<sup>12</sup> Hāptup ha ta' mōg Yeyox xix yāy yōg tik xop, ha Yeyox putup xūy,

<sup>13</sup> pa hāptox tu' pēnāhā piget kup, ha yōg mīxux punethok, ha ta' mōg, nūy piget ta pēnā', tu' mōg, pa piget ta pēnā 'ohnāg, yā mīxux pēnāhā', yā piget ta yōg mō'āgmũg'ah,

<sup>14</sup> ha Yeyox te piget kup pu hām'āktux, hu:

—Tikmũ'ũn te 'ōg mīnta xe māp-tup'ah. Kaxīy.

Ha Yeyox yōg tik xop te' xupak.

### *Yeyox xip Topa pet xexka tu'*

<sup>15</sup> 'Ūnũn Yeyox xix yāy yōg tik xop, tu nũktu' mōxaha kōmēn Yenoyanēn tu', tu ta' mōg Topa pet xexka tu', ha' nūn Yeyox, pa' pip tikmũ'ũn, tu' nōmenex, tu' pop tayūmak Topa pet xexka kopah, ha Yeyox te' xohix papuk, ha ta' mōg hāptopah, ha ta' mām tikmũ'ũn, tu tāyūmak nōy yānān, ha Yeyox

te yōg mīmpe xit'ax putxok, ha ta' mām tikmũ'ün, tu kuxxuxtut hāmenex, ha Yeyox te yōg mīmpe yũm'ax putxok,

<sup>16</sup> tu' xat, pu Topa pet xexka kopa hāpxop tat hok,

<sup>17</sup> tu tikmũ'ün pu hāmyũmmũgāhā', hu:

—Topa yōg tappet tu' kax'āmi Topa yōg hām'āktux. Yā Topa te: “Ūkpet 'āxet'ax putup 'ūhep xop xohix yōg Topa pu hām'āktux'ax pet.” Kaxīy. Pa 'āxop te' mīy xupxet'ax pet, nūy yāy xaptop! Kaxīy.

<sup>18</sup> Yā 'āmānex xexka xop te' xupak xix tik te hāmyũmmũg te', tu hāmpē'paxex texīy Yeyox putex, pa' yīpkutuk, yā tikmũ'ün tep-tup pax Yeyox yōg hāmyũmmũg'ax.

<sup>19</sup> 'Āmāxak ha ta' mōg Yeyox xix yāy yōg tik xop kōmēn kūnāpa'.

### *Āpu 'ākuxa mām Topa kopah*

<sup>20</sup> Hāptup ha ta' mōg Yeyox xix yāy yōg tik xop, tu piget kup yīka' mōg, tu' pēnāhā', yā' nak piget kup, yā' xexka 'ūnak,

<sup>21</sup> ha Pet te' xutigāhā', tu Yeyox pu hām'āktux, hu:

—Notot, pēnā'. Hōmā xate piget kup mānōg, ha ta hōnhā' nak. Kaxīy.

<sup>22</sup> Ha Yeyox te:

'Ākuxa mām Topa kopah,

<sup>23</sup> hu ta yīktix pu hām'āktux, hu: “Āpep, nūy mōg kōnāg xexka tu’”, kaxīy, puxix' mōg putup kōnāg xexka tu'. 'Ākuxa mām ka'ok Topa kopah, puxix mōg kōnāg xexka tu'.

<sup>24</sup> Yā 'āte xa hām'āktux: 'Āxop te Topa pu hām'āktux, nūy tatu hāpxop 'ūm xak. 'Āpu 'ākuxa

mām Topa kopah, nūy yūmmūg xe'e Topa te xa' popmāp-tup, ha Topa te xa' popmāp-tup 'ūxohix.

25 'Āxop te Topa pu hām'āktux. 'Āpu 'ūxaxogā', 'ūnōy te 'ākute'ex kummuk. 'Āpu 'ūxaxogā', putu' kux, ha ta pexkox tu Topa te' xaxogap-tup 'ōg hāpkummuk mīy'ax, putu' kux.

26 Xate tikmū'ūn yōg hāpkummuk mīy'ax xaxogā 'ohnāg, puxix 'Ātak pexkox yōg te 'ōg hāpkummuk mīy'ax xaxogā 'ohnāg. Kaxīy.

*Tep-te Yeyox pu yāy 'āxet'ax hōm*

27 Ta' nūn Yeyox xix yāy yōg tik xop, tu nūktu' mōxaha kōmēn Yēnoyanēn tu', tu ta' mōg tu mōktu Topa pet xexka hā' mōxaha', ha ta' nūn 'āmānex xexka xop xix tik te hāmyūmmūg xop, xix Yoneo xop yōg xexka xop, tu nūktu Yeyox pu hām'āktux, hu:

28 —Tep-te xa yāy 'āxet'ax hōm, xayīy hāpxopmā nūhū'? Tep-te' xat, xayīy mīy? Kaxīy.

29 Ha Yeyox te:

—'Āte xa yīkopit kamah. 'Āxop te hām'āktux xe'e', kopxix xa nōm 'āktux.

30 'Āpu hām'āktux: Tep-te Yoām pu yāy 'āxet'ax hōm, puyīy tikmū'ūn putox pix? 'Ok pe Topa te 'ok pe tikmū'ūn te'? Tep-te' xat? Kaxīy.

31 Ha yāy mūtik hām'āktux, hu:

—Yūmū'āte hām'āktux yā Topah, puxix yīkopit putup, hu: “Teptu 'ākuxa mām 'ohnāg Yoām kopah?”

32 Pa yūmū'ate hām'āktux yā tikmū'ūn, puxix xok 'ūm? Kaxīy.

Yā nōm te tikmū'ūn yīpkutuk. Yā tikmū'ūn te hāmpe'paxex Yoām te Topa pupi hām'āktux.

<sup>33</sup> Ha:

—'Īntu', 'ap yūmmũg'ah 'ũgmũ'āte'. Kaxīy.

Ha Yeyox te:

—Tep-te 'ā yāy 'āxet'ax hōm, 'ūyīy hāpxopmā nūhū'? 'Āte xa nōm 'āktux putup'ah kamah. Kaxīy.

## 12

### *Kāmānat kummuk*

<sup>1</sup> Hāpxip 'ihā Yeyox te tikmũ'ūn pu hām'āktux'ax hā hāmyūmmũgāhā', nūy Topa yōg hāpxopmā'ax yūmmũgā', tu:

—Tik yōg mīnta 'op tox pip hām xa'ax xexka kopah, tu hām pak'ax mīy tu' yīmap, tu hep tat'ax xexka mīy, nūy nōm kopa xupyāg mīy, tu mīptut tox mīy, nūy nōm kopa tik xix, puyīy hāpxop xohix pēnā'. Tik te kāmānat pu' hōm hām xa'ax, puyīy pēnā', tu ta' mōg hatō'a'.

<sup>2</sup> Hāpxip 'ihā mīnta yāy koxuk, ha hām xa'ax yōg xuxyā te tik nū'kutnāhā', puyīy mīnta yōg tayūmak pop,

<sup>3</sup> ha ta' mōg, pa kāmānat te tik mūg, tu' kix, tu nū'kutnāhā', 'ūhok tat.

<sup>4</sup> Ha hām xa'ax yōg xuxyā te xe tik nōy nū'kutnāhā', pa kām'ānat xop te nōm hāpkute'ex kummuk kamah, tu tik putox kix.

<sup>5</sup> Ha hām xa'ax yōg xuxyā te tik nōy nū'kutnāhā', pa kāmānat xop tep-tex. Ha xe' punethok mō'pok, pa kāmānat xop te yāg kute'ex kummuk, tu' yāg kix, ha' xakix.

<sup>6</sup> Nōmhā' xip yāp-xet, puyīy mō'kutnā', yā hām xa'ax yōg xuxyā kutok pit, ha hām xa'ax yōg xuxyā te hāmpe'paxex hu: “Kāmānat tek-tok 'āpak putup.” Kaxīy, tuk-tok nū'kutnāhā',

<sup>7</sup> pa kām'ānat xop te yāy mūtik hām'āktux, hu: “Yā hām xa'ax yōg xuxyāk-tok. 'Āpu yūmūp-tex, nūy pa hām xa'ax, nūy yūmū yōg hām xa'ax.” Kaxīy.

<sup>8</sup> –Kāmānat tek-tok mūg, tuptex, tu xok-xax putyōn hām xa'ax nāpah. Kaxīy.

<sup>9</sup> Tu Yexox te xe:

–Putep mūn mīy putup hām xa'ax yōg xuxyā nōmhā? Yā' mōg putup, nūy kāmānat kix, ha' xakixp-tup, ha kāmānat nōy pu hām xa'ax hōm putup.

<sup>10</sup> 'Ok 'āxop te mō'kupix Topa yōg tappet tu'. Yā' kax'āmi, hu: “Mīptut mīy'ax te mīkaxxap paha', tu hāmpē'paxex, yā' kūmmuk, tu' putyōn. Pa 'āmhok, yā' max xe'ēgnāg mīkaxxap,

<sup>11</sup> Yā Topa te' mīy, yā' max xe'ēgnāg!” Kaxīy.

<sup>12</sup> Ha ta' yūmmūg nōmhā Yoneo xop yōg xexka xop te', yā Yeyox te nōm xop 'āktux. Yā nōm tep-tup, nūy Yeyox kute'ex kummuk, pa 'āmhok, 'ūmīy 'ohnāg, yā tikmū'ūn yīpkutuk. Yā hāpxop mīy 'ohnāg, tu ta' mōg hato'a'.

### *'Ok max gohet pu tayūmak pagok*

<sup>13</sup> Hāpxip 'ihā tik te nū'pok Paniye xop xix 'Enot xop, puyīy Yeyox koit'ax xak.

<sup>14</sup> 'Ūnūn tu nūktu:

–Notot, 'ūgmū'āte' yūmmūg xate hāpxe'e 'āktux, tu tikmū'ūn yīpkutuk 'ohnāg. Xate' xexka xop yīpkutuk 'ohnāg, pa xate tikmū'ūn pu' yūmmūgāhā Topa te nōm putup. 'Āpu hām'āktux: putep xuktux yūmū yōg Topa yōg tappet tu'. 'Ok pe' max gohet pu tayūmak tanemēn'ax pagok, yā Hōm xop yōg xat'ax Xet pu pagok? 'Ok pe' kummuk? Kaxīy.



15 Pa Yeyox te' yūmmūg, tik pa max, pa yā' kuxa kummuk. Yeyox te:

—Teptu 'āxop te' xak 'āte' koit. Paxnū tayūmak 'ānuk, 'ū pēnā'. Kaxīy.

16 Ha ta' mōg, tu putpu' nūnnāhā', ha Yeyox te:

—'Ū'ūm yōg 'āxet'ax kax'āmi tayūmak 'ānuk tu'? Xix 'ū'ūm yōg xumix xip tayūmak 'ānuk tu'?

Ha:

—Yā gohet yōg xat'ax Xet yōg. Kaxīy.

17 Ha Yeyox te:

—'Āpu gohet yōg xat'ax pu gohet yōg xat'ax yōg hāpxop pagok. 'Āpu Topa pu Topa yōg hāpxop pagok kamah. Kaxīy.

Ha' kuxa te' yēy.

### *Texīy tikmū'ūn te putpu' hix*

18 Ha ta' nūn Xanuxeo xop, yā Xanuxeo xop te hāmp'e'paxex tikmū'ūn putpu' hip-tup'ah. 'Ūnūn, tu nūktu Yeyox pu hām'āktux hu:

19 —Notot, hōmā Mōyyex te yūmū'ā tappet kax'āmi, hu: “'Ūxok tihik, ha ta' xip xetut, pak-tok 'ūm xip'ah. Mōyyex te' xat, tik taknōy te xetut hokyūm mūtik yāytaha', pu' max, nūy nōy xok pu' pop kakxop.

20 Hōmā' pip 'ūtaknōy xohix te' 7. Tik māxap te 'ūn mūtik yāytaha', pak-tok 'ohnāg, tu' xok.

21 Ha' taknōy 'ūg-nāy tu te' yāytaha', tuk-tok put 'ohnāg, tu' xok, ha' taknōy yāykote hā kaxīy kama'.

22 Hā kaxīy 'ūxohix te' 7 te yāytaha 'ūn mūtik, 'ūk-tok 'ūm pop 'ohnāg, tu' xakix 'ūxohix. Hāpxip 'ihā' xok kama 'ūhūn.

23 Hāpxip 'īhā Topa te tikmū'ūn xohix putpu' hīnnāp-tup, 'ū'ūm yōg xetut nōmhā'? Yā xohix te' 7 te yāytaha 'ūn mūtik! Kaxīy.

24 Ha Yeyox te:

—'Āxop te hāmyūmmūg 'ohnāg! Texīy? Yā 'āxop te' yūmmūg 'ohnāg Topa yōg tappet. 'Āxop te' yūmmūg 'ohnāg Topa 'ūka'ok xexka'.

25 Yā xakix xop putpu' hip-tup. Topa yōg nū'pok xop te yāyta 'ohnāg pexkox tu'. Hā kaxīy tikmū'ūn te yāyta 'ohnāg pexkox tu'.

26 Hōmā Mōyyex te' kax'āmi tappet tu', tu putpu' hīnnā'ax kax'āmi'. 'Ok 'āxop te nōm mōkupix 'ohnāg? Yā 'ūkax'āmi Topa te mīm pahok kup puk kopa Mōyyex pu hām'āktux, hu: “'Ūgmūn yā 'Amanām yōg Topah, xix 'Iyak yōg, xix Yako yōg.” Kaxīy.

27 Hā kaxīy Topa te' xuktux 'ap xakix xop yōg Topa'ah, pa yā hi xop yōg. 'Āxop te hāmyūmmūg 'ohnāg. Kaxīy.

### *Topa yōg xat'ax xexkanām*

28 Ha ta' xip tihik, tu' xip tik te hāmyūmmūg xop kopah, tu hām'āktux 'āpak, tu' yūmmūg Yeyox te hām'āktux max. Tik te Yeyox pu hām'āktux, hu:

—Topa te tikmū'ūn xat. Xat'ax 'ūm xexkanām? Kaxīy.

29 Ha Yeyox te:

—Yā Topa te tikmū'ūn xat, hu: “'Iyaet xop, 'āpu 'ūxupax. Yūmūg xuxyā yā yūmū yōg Topa yāp-xet, yā' nōy xip'ah.

30 'Āpu 'āxuxyā Topap-tuppax 'ākuxa xexka hā xix 'ākoxuk xexka hā xix 'āp-tox xexka hā xix 'ōg ka'ok'ax xexka hā'.” Kaxīy.

31 Ha Topa te xe tikmũ'ũn xat, yã xat'ax 'ũk-nãy tu'. Topa te: “Āpu 'ãnõy putup pax xate yãy putup pax putuk.” Kaxĩy. Yã' xat'ax tix 'ũxexkanãm, ha ta xat'ax nõy 'ũxexka'. Kaxĩy.

32 Ha tik te:

—Notot, yã hãm'ãktux max! 'A' koit'ah. Yã' xip Topap-xet, ha ta' nõy 'ũm 'ap xip'ah.

33 Yã' max yũmũ'ãte Topap-tuppax yãy kuxa xexka hã xix yãy putox xexka hã xix yãy ka'ok'ax xexka hã. Yã' max kama yũmũ'ãte yãy nõy putup pax yũmũ'ãte yãy putup pax putuk. Yã' max xexka yũmũ'ãte xat'ax tix mĩy nõ'õm, ha ta' max miax yũmũ'ãte xokxop mõ'hap, nũy Topa pu haxyã'. Kaxĩy.

34 Ha Yeyox te' yũmmũg tik te hãmyũmmũg, yã hãm'ãktux max. Yeyox te:

—Āxip Topa yõg xop yĩka' Topa te nõm xat, ha' yĩpkox pip. Kaxĩy. Ha tikmũ'ũn kuxa nõg, hu xe hãpxop nõy yĩkopit 'ohnãg.

### *Topa yõg yãyikutnã'ax*

35 'Ūxip Yeyox Topa pet xexka tu', tu tikmũ'ũn pu hãm'ãktux, hu:

—Teptu tik te hãmyũmmũg xop te tikmũ'ũn pu' yũmmũgãhã Topa yõg yãyikutnã'ax yã Namix mõkputox?

36 Pa Topa Koxuk te Namix kax'ãmiyãhã', ha tute kax'ãmi', hu: “Yũmũg xuxyã Topa te 'ũgxuxyã pu hãm'ãktux, hu: Yũhũm 'ũgyĩm xe'e tu', ha 'ãte puknõg gãy xop xix putup 'ãpata yĩkãgnãg.” Kaxĩy.

37 Yã Namix te: “Ūkxuxyã'.” Kaxĩy. Yã Topa yõg yãyikutnã'ax xãnãhã, hu: “Ūkxuxyã'.” Kaxĩy. Texĩy Topa yõg yãyikutnã'ax yã Namix mõkputox? Kaxĩy.

### *Yeyox xix tik te hāmyūmmūg xop*

Ha tikmū'ūn xohix te Yeyox yōg hām'āktux putup pax.

<sup>38</sup> Ha Yeyox te:

—Pa 'ātix, tik te hāmyūmmūg xop tep-tup pax, nūy hāpkumep, nūy topixxax xe'ēgnāg ta', puyīy tikmū'ūn nōm 'āktux max, yā nōm 'āpak nāpet tu'. Tik te hāmyūmmūg xop te' pop 'ūxexka xop yōg pip'ax Yoneo xop yōg Topa pet kopa

<sup>39</sup> xix 'āmuk xexka tu',

<sup>40</sup> tu hokmām xop yōg hāpxop pop, tu' xupxet, tu Topa pu hām'āktux, puyīy tikmū'ūn hāmp'e'paxex yā' max. Topa te yōg hāpkummuk mīy'ax yānān xexkap-tup! Kaxīy.

### *'Ūn hok yūm te tayūmak nīm*

<sup>41</sup> Ūxip Yeyox Yoneo yōg Topa pet kopa tayūmak tat'ax mīpkox yīkak, tu' pēnāhā tikmū'ūn nūn, nūy tayūmak nīm tayūmak tat'ax kopah. Tikmū'ūn punethok 'ūp-texop xexka te tayūmak xohix nīm,

<sup>42</sup> ha ta' nūn 'ūhūn, yā hok yūm, yā hām hōgnāg. 'Ūnūn, tu nūktu tayūmak 'ānuk tix mō'tat mīpkox kopah, yā tayūmak kutōgnāg.

<sup>43</sup> Ha Yeyox te yāy yōg tik xop xānāhā', tu:

—'Āte xa hāpxe'e 'āktux, nū 'ūn hok yūm, yā hām hōgnāg, pa yā hāpxop xohix mō'tat, pa nōm nōy xohix te hāpxop kutīgnāg mō'tat.

<sup>44</sup> Yā 'ūp-texop xexka xop yōg hāpxop punethok, tu tayūmak yāgnāg xut, nūy mō'tat, ha yōg hāpxop punethok pip, pa 'ūn hok yūm te yāy yōg hāpxop xohix mō'tat, ha' nōg. Kaxīy.

# 13

## *Topa pet xexka kōyyōy putup*

<sup>1</sup> Tu ta' mōg Yeyox xix yāy yōg tik xop, ha tik xop te:

—Yāyā, pēnā Topa pet xexka 'ūmax xe'ēgnāg, yā mīptut max!

<sup>2</sup> Ha Yeyox te:

—'Ok mīptut max xe'ēgnāg pēnāhā'? Hāpxip 'īhā yōg mīkaxxap te' nōy yīmū' mām putup'ah, yā' xohix xexka kōxyōy putup! Kaxīy.

## *Tikmū'ūn te 'āxop xūygāp-tup*

<sup>3</sup> Tu ta' mōg Yeyox xix yāy yōg tik xop, tu mōktu yīktix 'Onimet yīmū' mām, ha Pet te' yīkopit, xix Tiak te, xix Yoām te, xix 'Ānene te', hu:

<sup>4</sup> —Hām'ūmhā nōm hāpxopmāp-tup? Tikmū'ūn te hāpxopmā'ax 'ūm pēnāp-tup, 'īhā nōm hāpxopmāp-tup? Kaxīy.

<sup>5</sup> Ha Yeyox te hāmyūmmūgāhā kōnāmāhā', hu:

—Pa 'ātix, nūy hāmyūmmūg, nūy 'ākuxa mām hok koit'ax kopah.

<sup>6</sup> Yā' nūn putup 'ūxohix, tu hām'āktux putup, hu: “'Ūgmūn nō'ōm, Topa tek mūn yāy kutnāhā', yā Yeyox 'ūgmūn!” Kaxīy. Ha tikmū'ūn xohix kuxa mām putup koit'ax kopah.

<sup>7</sup> 'Āxop te' xupak putup hāmnūhūn xexka hāmhūmnāg, yā tikmū'ūn te yāy kix kakīynāg. Ha tikmū'ūn nūn putup, tu: “Yā yāy kix kakīynāg tikmū'ūn hāptox tu'.” Kaxīy. 'Āpu 'ākuxa nōg hok. Yā tikmū'ūn te yāy kix putup te kaxīy, pa hāpkux 'ohnāg.

<sup>8</sup> Hāpxexka yōg tikmū'ūn te hāpxexka nōy yōg tikmū'ūn mūtik yāykix putup, ha ta' hep xop te'

hep xop nōy mūtik yāy kix putup, ha ta hām xexka yāy nuhuk nām panip putup, ha ta hām hōgnāg, ha putup te tikmū'ūn kix putup. 'Ūn tek-tok putup, tu' xūy xexka'. Hā kaxīy tikmū'ūn xūy putup, ha mōktu hāpkux.

<sup>9</sup> Pa 'ātix, tikmū'ūn te 'āxop mōgāp-tup 'ūpa te hāmyūmmūg xop tu', puyīy 'āxop kopit, yā 'āxop kummugāp-tup. Ha tikmū'ūn nūn putup kamah, nūy 'āxop kix xikot hā Yoneo xop yōg Topa pet kopah. Yā 'ākuxa mām 'ūgkopah, yīy ta' nūn putup tikmū'ūn, nūy 'āxop mōgā gohenanok tu' xix gohet yōg xat'ax xexka tu', puyīy 'āxop kopit, ha 'āxop te nōm pu Topa yōg hām'āpak max'ax 'āktux,

<sup>10</sup> ha tikmū'ūn te' hep xop xohix xexka pu Topa yōg hām'āpak max'ax 'āktux putup hāmāxap, hak-nāy tu hāpkux.

<sup>11</sup> Tikmū'ūn te 'āxop mūg, nūy 'āxop mōgā' gohet yōg xexka xop tu'. 'Āpu 'ākuxa nōg hok. 'Āpu hāmpē'āpaxe hok, hu: "Āte putep xuktux putup?" Kaxīy. Pa 'ām hok, 'āmōg putup gohet yōg xexka tu', ha Topa te xa hām'āktux'ax hōm putup, xayīy hām'āktux, yā 'ōg hām'āktux 'ohnāg, pa yā Topa Koxuk mūn yōg.

<sup>12</sup> Tikmū'ūn punethok te yāy taknōy mōgāp-tup gohet yōg xexka xop tu', puyīy nōm kix, ha ta 'ātak te yāy kutok mōgāp-tup kamah xi' tut te', puyīy nōm kix. Ha tak-tok te 'ātak mōgāp-tup kama xi' tut, puyīy nōm kix, ha' xakix putup 'ūxohix.

<sup>13</sup> 'Ākuxa mām 'ūgkopah, yīy tikmū'ūn te 'āp-tup nōg putup, pa 'āpu 'ākuxa mām ka'ok mōkuma'āmōg, ha Topa te 'āhīnnāp-tup. Kaxīy.

## 'Ūxūy xexka'

14 Yeyox te xe:

—'Āxop te' pēnāp-tup hāpxop yāy 'īgā xexka 'ūnōy yōg xip'ax tu'—xate nū mōkupix, 'āpu hāmyūmmūg —'āxop pip hāpxexka Yonex tu', nūy ta mōg mō'ka'ok yīktix tu'.

15 'Āxop mām mīptut yīmū, nūy ta mōg mō'ka'ok. Mīptut hā mōxa hok, nūy hāpxop pa'.

16 'Āxop pip hāpxa tu', nūy ta mōg mō'ka'ok, yāy pet hā mōxa hok, nūy topixxax pa'

17 Yā' kummuk xexkap-tup 'ūn tek-tok xuk xop pu' xix 'ūn tek-tok put xop pu'.

18 'Āpu Topa pu hām'āktux, nūy ta tu' xak, puyīy tikmū'ūn 'āxop kummugā mō'āgmūg pukpex 'ihā'.

19 Yā nōm 'āmnīy hā 'āxop xūy xexkap-tup, pa hōmā Topa te' mīy hām xexka xix hōnhā' xūy kutōgnāg.

20 Topa te' xat, xayīy 'āmnīy xohix'ah hā 'āxop xūy putup. Topa te' xat hok, puxix xakix xohix xexka'. Pa' pip Topa kopa kuxa mām ka'ok xop, yā Topa te nōm yīmōgātux, nūy nōm hīnnā', hu' xat putup, puyīy 'āmnīy xohix'ah hā' xūy.

21 —Tikmū'ūn te hām'āktux putup, hu: “Mū, nūy pēnā', Topa yōg yāykutnā'ax xip nūnteh.” Kaxīy. Ha ta' nōy te hām'āktux putup, hu: “Mōg, nūy pēnā', Topa yōg yāykutnā'ax xip 'ōnteh, yā' xip Yeyox.” Kaxīy. 'Āpu 'āyīpkox pip hok. Yā' koit.

22 Yā nōm koit xop te Topa pupi hām'āktux xop putuk putup, tu Topa yōg yāykutnā'ax putuk putup, tu hāpxopmā ka'ok xe'ēgnāg, nūy Topa putuk, puyīy tikmū'ūn kuxa' yēy. Nōm tep-tup, nūy Topa yōg yīmōgātux xop kuxa mām koit'ax kopah.

23 Pa 'ätix. 'Äte 'ãxop pu hãmyũmmũgãhã' hõnhã'. Hãpxip 'ihã nõm hãpxopmã'ax pẽnãp-tup, tu' yũmmũg putup. Kaxĩy.

### *Tikmũ'ũn Kutok putpu' nũn*

24 Yeyox te xe:

—Yã' xũy xexka nõg putup, ha ta mãyõn yãyhãp-tup hãpkoxtap, ha ta mãyõn hex yãnãm pip putup'ah,

25 ha ta mãyõnnãg pip pexkox yo'oma', pa xakux putup, ha ta hãpxop xohix ka'ok nuhuk putup pexkox yo'oma' xix pexkox kopah,

26 ha ta pexkox tuk yĩxop-tup, yã Tikmũ'ũn Kutok, tu hãmgõy xexka kopak yĩxop-tup, yã' max xe'ëgnãg, ha tikmũ'ũn xohix te' pẽnãp-tup,

27 ha 'äte yãy yõg pexkox yõg nũ'pok xop mõ'pok putup hãpxexka xohix tu'. 'Ûmõg putup, nũy Topa yõg yĩmõgãtux xop nũnnã', puyĩy xohix yãy tu nũ'nã'. Kaxĩy.

### *Piget kup*

28 Yeyox te xe:

—'Äpu hãmyũmmũg. 'Ûxip piget kup, tu yõg mĩmmãg tup, tu yõg mĩxux xupep. 'Äxop te' pẽnãhã' tu' yũmmũg mõ'ãgmũg pukpex, yã tex tihix.

29 Hã kaxĩy xate nõm hãpxopmã'ax pẽnãp-tup 'äte xa nõm 'ãktux, tu' yũmmũg putup 'ũgnũn putup putpu'.

30 'Äpu hãmyũmmũg, hõnhã' pip tikmũ'ũn, ha ta' yãg te nõm hãpxopmã'ax xohix pẽnãp-tup, pa yã' yãg te' pẽnãp-tup 'ohnãg, pa xakix putup hãmãxap.



<sup>31</sup> 'ūnōg putup hāmnōgnōy xix hām xexka', pa yōgnū hām'āktux pip mōkuma'mōg, tu' nōg putup 'ohnāg. Kaxīy.

### *Hām'ūmhā*

<sup>32</sup> Yeyox te xe:

—Hām'ūmhā tikmū'ūn te nōm hāpxopmā'ax pēnāp-tup? Hāptup 'ūm, pe 'āmnīy 'ūm? Māyōn yūm 'ūm? Yā pexkox nū'pok xop te' yūmmūg 'ohnāg, ha Topak-tok te' yūmmūg 'ohnāg, pa 'ātak Topa puxehnāg te' yūmmūg.

<sup>33</sup> Pa 'ātix. 'Āpu 'ūkip, nūy hāmpēnā'. Yā 'āxop te' yūmmūg 'ohnāg. Hām'ūmhā nōm hāpxopmā'ax pēnāp-tup? Yā 'āxop te' yūmmūg 'ohnāg.

<sup>34</sup> Yā hā kaxīy putuk. Tik mōg putup hāptox tu', tu kāmānat xex, puyīy hām, tu hāmyīkox pēnā'ax xat, puyīy hāmpēnā', tu ta' mōg tihik.

<sup>35</sup> Hām'ūmhā putpu' nūn putup tihik, 'ok pe 'āmāxak, 'ok pe 'āmnīy kote hā, 'ok pe xokakkak tak xata hā, 'ok pe hām yāy kuhmōy hā? Yā kāmānat te' yūmmūg 'ohnāg. Hā kaxīy tikmū'ūn te' yūmmūg 'ohnāg, hām'ūmhā 'ūgnūn putup putpu'.

<sup>36</sup> 'Ūgnūn putup, pa tikmū'ūn mō'yōn, yā' kum-muk.

<sup>37</sup> 'Āte xa hām'āktux, xix tikmū'ūn xohix pu nōm 'āktux, hu: “Pa 'ātix!” Kaxīy.

## 14

### *Ūp-tup, nūy Yeyox putex*

<sup>1</sup> Hōnhā 'āmnīy tix 'īhā 'āmuk xexka xip'ax, yā 'āmuk xexka 'āxet'ax Nōa' Yēn xix Pām Tokatok Hok. Ha 'āmānex xexka xop tep-tup xix tik te

hāmyūmmūg xop tep-tup, puyīy xonat xop Yeyox mūy, puyīy kīy, 'ūp-tex putup hah,

<sup>2</sup> tu yāy mūtik hām'āktux, hu:

—Pa 'āmhook hōnhā'ah. Yā 'āmuk xexka xip. Hōnhā yūmū'āte Yeyox putex, puxix tikmū'ūn gāy xexkah. Nāy, pu 'āmuk xexka mā kux. Kaxīy.

*Yeyox xip xiptuxexka Metān tu'*

<sup>3</sup> 'Ūxip Yeyox xiptuxexka Metān tu' Xīmām pet kopah, yā Xīmām xax kunutnām. Ha ta' nūn 'ūhūn, tu mīkaxxap koxnāg max nūnnāhā', yā mīkaxxap 'anamax hā' mīy, ha' kopa' xip hep haxnāg max 'ūxuxet'ax nān, yā takat xexkah. 'Ūn nūn, tu nūktu mīkaxxap koxnāg koxyōy, tu Yeyox putox yīmū hep pux.

<sup>4</sup> Ha ta' pip tikmū'ūn, tu' gāy, tu yāy mūtik hām'āktux, hu:

—Yā' kummuk. Teptu hā kaxīy hep haxnāg max putyōn?

<sup>5</sup> Yā hep nōmenex, pu' max, nūy tayūmak pop, nūy 'ūhok xop pu nōm popmā'. Yā yōg tayūmak xexkah, yā yōg tayūmak 'ānuk, yā yānām ponnok hā mīy, yā xohix te' 300 'ūyōg tayūmak 'ānuk. Kaxīy.

Yā tikmū'ūn te 'ūn mānōg,

<sup>6</sup> pa Yeyox te:

—'Ūmānōg hok' Teptu 'āxop gāy xexkah? 'Ūn te hāpxopmā max.

<sup>7</sup> Yā' hok xop pip mōkuma'mōg 'āxop kopah. 'Āxop tep-tup, nūy ta nōm hā tehet, pak xip ka'ok 'ohnāg 'āxop kopah.

<sup>8</sup> 'Ūn te hāpxopmā max yūmmūg, hu' mīy. 'Ūkxok putup, hak hāpkot putup, yīy ta hōnhā 'ūn tek yīn muk, nūy haxyā max, xokxax putuk.

9 'Āte xa' hāpxe'e 'āktux tikmũ'ũn te hāpxexka xohix tu' Topa yōg hām'āpak max'ax 'āktux putup, tu nũ 'ũn 'āktux putup kamah.

*Yot te gāy xop mōgāp-tup Yeyox ha*

10 Ha ta' mōg Yot 'Īxkanot, yā' xip Yeyox yōg tik te 12 xop kopah, tu' mōg, tu mōktu 'āmānex xexka xop mūtik hām'āktux, nũy gāy xop mōgā Yeyox ha, puyīy xūygā',

11 ha 'āmānex xexka xop te' xupak, hu' kuxa hittup, tu:

—'Ūgmũ'āte xa tayūmak popmāp-tup. Kaxīy.

Hā kaxīy Yot te gāy xop mōgāp-tup Yeyox ha, puyīy xūygā'? Yā Yot te hāmpe'paxex.

*'Āmuk xexka 'āxet'ax Nōa' Yēn*

12 'Āmuk xexka xip 'āxet'ax Pām Tokatok Hok, yā 'āmniy māxap, 'ihā Yoneo xop te kahnēn kutok kix 'āmuk xexka 'āxet'ax Nōa' Yēn pu'. Ha ta' pip Yeyox yōg tik xop, tu Yeyox pu hām'āktux, hu:

—Pi'yā xatep-tup? Pi'yā 'ūgmũ'āte 'āmuk xexka Nōa' Yēn mīy putup? Kaxīy.

13 Ha Yeyox te yāy yōg tik mō'pok, tu' xat, hu:

—Mōg kōmēn tu'. 'Āmōg putup, pa' mōg putup tihik, tu naxtox hā kōnāg tat putup. 'Āpu nōm pe mōg.

14 Tik te mīptut hā mō'nāp-tup. 'Āpu nōm hā mōxā kamah, nũy xuxyā pu hām'āktux. 'Āpu hām'āktux, hu: “Yāyā te' yīkopit. Pi'yā' yūm hām'āta kox? 'Ūgmũ'āte 'āmuk xexka Nōa' Yēn mīy putup 'ōnteh, 'ūgmūn xix yāy yōg tik xop.” Kaxīy.

15 Ha tik te xa' mūg hām'āta kox max, yā pepi' yūm, ha' pip mīmpe max. 'Ōnte 'āxop te' mīy putup 'āmuk xexkah. Kaxīy.

16 Ha ta' mōg Yeyox yōg tik tix, tu mōktu hāpxop xohix pēnāhā Yeyox te nōm xuktux, tu 'āmuk xexka 'āxet'ax Nōa' Yēn mīy.

17 Āmāxak ha ta' mōg Yeyox xix yāy yōg tik xop, tu mōktu hām'āta kox hā' mōxaha',

18 tu mīmpe xit'ax tu' mām, tu' xit, ha Yeyox te:

—Hamūn, 'āte xa hām'āktux. 'Ūxip tihik 'āxop kopah, tuk mūtik xit. Tute' gāy xop nūnnāp-tup, puyīy 'ūgxūygā'. Kaxīy.

19 Ha Yeyox yōg tik xop kuxa hittup 'ohnāg, ha yāp-xet te:

—Yāyā, 'ū'ūm? 'Ok 'ūgmūn? Kaxīy.

Ha ta' nōy te yīykopit, ha' nōy te, tu mōktu xohix te' yīykopit kamah.

20 Ha Yeyox te:

—Yā tik puxet 'āxop kopah, yā nōm te pām pix putup kānēy pet xax kopah.

21 Yā 'ūkxok putup, yā Tikmū'ūn Kutok xok putup. Yā hā kaxīy Topa yōg tappet te nōm 'āktux. Tik te gāy xop mōgāp-tup Tikmū'ūn Kutok ha, puyīy xūygā'. Yā' kummuk xexka nōm pu'. 'Ūtut te nōm put 'ohnāg, pu' max! Kaxīy.

*Pām māhā', tu xupyāg xo'op, nūy Yeyox pe'paxeh*

22 'Ūxit Yeyox xix yāy yōg tik xop, ha Yeyox te pām paha', tu Topa pu hām'āktux, hu:

—Xatek mū'ā pām popmāhā'. 'Āmax. Yā' max. Kaxīy.

Yeyox te pām koxip, tu yāy yōg tik xop pu nōm popmāhā', tu:

—Āpu 'ūpop. Nūhū yā 'ūgyīn. Kaxīy.

<sup>23</sup> Tu kānēy xo'op'ax paha', tu Topa pu hām'āktux, hu:

—Topa, yā' max, 'āmax. Kaxīy.

Tu ta yāy yōg tik xop pu' hōm, ha' xo'op.

<sup>24</sup> Ha Yeyox te:

—Nūhū yā 'ūkhep 'āta. 'Āte yāy hep 'āta tikmū'ūn xohix pupi nū'nāp-tup. 'Ūkhep 'āta yā pa'ax tup Topa yōg xix tikmū'ūn yōg.

<sup>25</sup> 'Āte xa hām'āktux xe'e', 'āte xe xupyāg xo'op putup'ah. Nāy, pu Topa yāy yōg tikmū'ūn xat putup, ha' yīpkox pīp, 'īhā xe' xo'op.

<sup>26</sup> Ha' xohix te Topa puk-tex, tu ta' mōg yīktix 'Onimet tu'.

### *Yeyox te Pet pu hām'āktux*

<sup>27</sup> Ha Yeyox te yāy yōg tik xop pu hām'āktux, hu:

—Āxop xohix tek nīm putup. Yā Topa yōg tappet te: “Tikmū'ūn te kahnēn pēnā'ax putex putup, ha ta kahnēn xumāp-tup.” Kaxīy.

<sup>28</sup> Pa putpuk hip-tup 'ūgmūn, tu tak mōg putup 'āxop keppa hāpxexka Ganinet tu'. Kaxīy.

<sup>29</sup> Ha Pet te:

—'Āmhok! 'Āte 'ānīm putup'ah. Nōm xohix te 'ānīm putup, koxix 'ānīm putup'ah. Kaxīy.

<sup>30</sup> Ha Yeyox te:

—'Āte xa hām'āktux xe'e: 'āmniy ha ta hām'āktux tikoyuk xate, hu: “'Āte Yeyox yūmmūg 'ohnāg!” Kaxīy. Hāpxip 'īhā xokakkak tak xatap-tup tix. Kaxīy.

<sup>31</sup> Pa Pet te xe hām'āktux ka'ok, hu:

—'Ãmhok! 'Ãte nôm 'ãktux putup'ah, 'âyũmmũg 'ohnãg. 'Ûkxok 'ãmũtik, kopxix nôm 'ãktux putup'ah. Kaxĩy.

Ha ta nôm 'ãktux kamah Yeyox yõg tik xohix xop.

*Yeyox xip mĩm mãtiknãg Yetxẽm tu'*

<sup>32</sup> Tu ta' mõg Yeyox xix yã yõg tik xop mũtik mĩm mãtiknãg tu' 'ũxuxet'ax Yetxẽm, tu' mõg, tu mõktu' mõxaha', ha Yeyox te:

—Mãhãm nũnteh, 'ĩhãg mõg, nũy Topa pu hãm'ãktux. Kaxĩy.

<sup>33</sup> Tu ta' mõg Yeyox, tu' mõgãhã Pet, xix Tiak xix Yoãm, tu hãpxip 'ĩhã Yeyox kuxa hittup 'ohnãg kõnãmãhã', tu' kuxanõg xexkah,

<sup>34</sup> tu:

—'Ûgkuxa hittup 'ohnãg, yãg xok putup putuk. 'Ãpu nox 'ãti nũnteh, nũy 'ũkhip. Pa 'ãtix. Kaxĩy.

<sup>35</sup> Tu ta' mõg kutõgnãg, tu mõ hãm nĩy, tu Topa pu hãm'ãktux, hu:

—Topa, xate' xat, kopxik xũy putup'ah.

<sup>36</sup> Tak yõgnũ 'ãtak, xate hãpxopmã xohix yũmmũg. 'Ãpu xat, 'ũyĩy xũy hok. Pa 'ãtep-tup'ah 'ãte nôm putup, pa 'ãtep-tup xate nôm putup. Kaxĩy.

<sup>37</sup> Tu ta' nũn putpu', tu nũktu yã yõg tik tikoyuk pẽnãhã', ha mõ'yõn, ha Yeyox te Pet pu:

—Xĩmãm, 'ok mõ'õn? 'Ok mãyõn mõg kutõgnãg hãg hip 'ohnãg?

<sup>38</sup> 'Ãpu 'ãpa ka'ok, nũy Topa pu hãm'ãktux, puyĩy nõy 'ãxapit hok, xayĩy hãpkummuk mĩy. 'Ãkoxuk tep-tup, nũy mõ'yõn hok, pa 'ãyĩn tep-tup, nũy mõ'yõn, yã 'ãkoxuk ka'ok, pa 'ãyĩn pu'uk. Kaxĩy.

<sup>39</sup> Tu ta xe' mõg Yeyox, nũy Topa pu hãm'ãktux, tu yõg hãm'ãktux 'ãktux 'ũxehet, yã' yã yõg putuk,

<sup>40</sup> tu ta xe' nūn putpu', pa' pip yāy yōg tik xop, tu mō'yōn. Yā kūmīm tep-tex xexkah, tu' pa ka'ok yūmmūg 'ohnāg, tu yānān hām'āktux yūmmūg 'ohnāg.

<sup>41</sup> Ha ta' xe' mōg Yeyox, tu xe' nūn putpu', yā' nūn tikoyuk, tu:

—'Ok mō'ōn kux'ah, 'ok kūmīm te 'āp-tex? Puxix! Yā nōmhā'! Yā nōmhā tik nūn, nūy hāpkummuk mīy xop nūnnā', puyīy 'ūgmūn Tikmū'ūn Kutok xūygā'.

<sup>42</sup> Pepix 'āpip. 'Āpu yūmū mōg. Pēnā', 'ūnūn tihik, tu' gāy xop nūnnāhā, puyīy 'ūkxūygā'! Kaxīy.

### *Tikmū'ūn te Yeyox mūg*

<sup>43</sup> Yeyox te hām'āktux, 'ihā' xupep Yot, yā nōm te Yeyox yōg tik te 12 xop kopa' xip, ha nūmūti' mōxaha tikmū'ūn, ha' taha mīkaxxexka xix mīptopnāg. Yā 'āmānex xexka xop te nū'pok, xix tik te hām yūmmūg xop te', xix Yoneo xop yōg xexka xop te'.

<sup>44</sup> Yā Yot tep-tup, nūy gāy xop mōgā', puyīy Yeyox xūygā', hu nūmūtik hām'āktux, “'Āte tik kep hā' mūg putup. 'Āpu nōm mūy, nūy mōgā'. Yā nō'ōm.” Kaxīy.

<sup>45</sup> Hāpxip 'ihā' nūn Yot, tu nūktu Yeyox yīkāgnāg xip, tu:

—Yāyā'! Kaxīy.

Tu' nōy kep hā' mūg, yā xape xop putuk.

<sup>46</sup> Ha tikmū'ūn te Yeyox mūg, tu' hīy.

<sup>47</sup> Ha ta' xip tihik, tu mīkaxxexka xut, tu tik te 'āmānex xop xat yōg kāmānat yīpkox xak,

<sup>48</sup> ha Yeyox te tikmū'ūn pu hām'āktux, hu:

—'Ok 'āxop nūn, tu' taha mīkaxxexka xix mīptopnāg, nūy xupxet hīy? Yā' putuk.

49 Hōmāg xip ka'ok 'āxop kopah, nūy 'āxop pu hāmyūmmūgā' Topa pet xexka tu', pa 'āxop tek hīy 'ohnāg. Pa hōmā 'ūhittap nōm te kax'āmi Topa yōg tappet tu', ha ta hōnhā nōm putuk. Kaxīy.

50 Ha Yeyox yōg tik xop te Yeyox nīm, tu hāpxūmānām.

51 Yā' xip tik tuktup, tu komenok ponnok hā' taha', ha tikmū'ūn te' hīy putup,

52 pa tik te' nīm komenok, tu' xaxtop, tu ta' mōxupaha'

*Yoneo xop yōg xexka xop te Yeyox kopit*

53 Hāpxip 'ihā tikmū'ūn te Yeyox mōgāhā tik te 'āmānex xop xat pet tu', tu mōktu' mōxaha', ha' pip 'āmānex xexka xop, xix Yoneo xop yōg xexka xop, xix tik te hāmyūmmūg xop.

54 Ha ta' xip Pet, tu hāptox tu Yeyox pe' mōg, tu mōktu' xupep tik te 'āmānex xop xat pet yōg hāmnuhnōg tu', tu' yūm kuxap yīkak xonat xop mūtik, nūy xapak.

55 Ha ta' pip 'āmānex xexka xop, xix tik pa te hāmyūmmūg xop te hāmpē'paxex, texīy Yeyox 'āktux kummuk putup, puyīy putex. Pa 'āmhok, 'ap yūmmūg'ah.

56 Tikmū'ūn xohix te' kupex, tu' koit, pa' yāy yōg hām'āktux te' nōy yōg putuk 'ohnāg.

57 Yā tikmū'ūn tek-nīhā' pip, tu' koit, hu:

58 — 'Ūgmū'āte Yeyox yōg hām'āktux 'āpak, yā tute: "Tikmū'ūn te Topa pet xexka mīy, ha ta 'āte' koxyōy putup, pa 'āte xe' mīy putup 'āmnīy tikoyuk hā. Yā tikmū'ūn te nōm mīy putup 'ohnāg." Kaxīy.

59 Tikmū'ūn te hām'āktux, pa' yōg kupex'ax te yāy putuk 'ohnāg.



60 Ha tak-nîhâ' xip tik te 'ãmānex xop xat tikmũ'ũn kopah, tu Yeyox pu hām'āktux, hu:

—'Ok xate hām'āktux yānān 'ohnāg? Kaxīy.

61 Pa' yēy. Yā hām'āktux yānān 'ohnāg, ha tik te 'ãmānex xop xat te xe:

—'Ok Topa te 'āyāyikutnāhā'? 'Ok Topa xe'ēgnāg kutok? Kaxīy.

62 Ha Yeyox te:

—Yā hamũn. 'Āxop xohix tek pēnāp-tup, yā Tikmũ'ũn Kutok pēnāp-tup. 'Ūgyũm putup Topa ka'ok yīm xe'e tu'. 'Āxop te kamak pēnāp-tup, 'ūkxip putup pexkox kopah, tu ta yīxop-tup hāmgōy xexka kopah! Kaxīy.

63 Ha tik te 'ãmānex xop xat te yāy topixxax pot, yā' gāy, tu:

—Puxix. Yā hām'āktux kummuk!

64 Tute Topa 'āktux kummuk. 'Āxop te' xupak. Putep hāmpē'āpaxex nōmhā'? Kaxīy.

Ha tikmũ'ũn xohix te Yeyox putup nōg, tu hām'āktux, hu:

—'Āpu 'ūp-tex! Kaxīy.

65 Ha tikmũ'ũn te yīynīn xōn kōnāmāhā Yeyox tu', tu' nōy putox mō'nīy, tu' kix, tu:

—'Āpu hām'āktux. Tep-te 'ākix? Kaxīy.

Ha ta' pip xonat, tu Yeyox kix yāy yīm hā.

*Pet te hām'āktux Yeyox yūmmūg 'ohnāg*

66 Ha ta' xip Pet kukpa hāmnuhnōg tu', ha' nūn tik te 'ãmānex xop xat yōg kāmānat hex,

67 tu nūktu Pet pēnāhā', tu:

—Hōmā 'āxip kōmēn Nāyane yōg Yeyox mūtik, yā yōg xop kopa 'āxip. Kaxīy.

68 Pa Pet te:

—'Ap 'āte nōm yūmmūg'ah. Putep 'āktux? Kaxīy. Tu ta' mōg Pet hāmpak'ax mō'nīnyīn'ax tu', 'ihā xokakkak tak xataha'.

<sup>69</sup> Ha kāmānat hex te Pet pēnāhā', ha yīka' nōy pip, ha kāmānat hex te:

—Hamūn, tihik 'ōhōm yā Yeyox yōg xop kopa' xip. Kaxīy.

<sup>70</sup> Pa Pet te:

—'Āk mūn'ah. Kaxīy.

Hāpxip 'ihā tikmū'ūn te:

—Hamūn. 'Ūgmū'āte' yūmmūg xe'e. 'Āxip Yeyox yōg tik xop kopah. Hamūn, 'āmūn yā hāpxexka Ganinet yōg tihik kamah. Kaxīy.

<sup>71</sup> Ha Pet te:

—'Āte xa hām'āktux, ha Topa te' xupak, tu' yūmmūg. 'Āxop te tik 'āktux, pa 'āte nōm yūmmūg 'ohnāg! 'Āte' koit, puxix Topa 'ūgkix! Kaxīy.

<sup>72</sup> Hāpxip 'ohnāg 'ihā xe' xataha xokakkak tak, ha Pet te' xutigāhā', yā hōmā Yeyox te: “Xate hām'āktux tikoyuk, hu: 'Āte Yeyox yūmmūg 'ohnāg! Kaxīy. 'Ihā xokakkak tak xatap-tup tix.” Kaxīy.

Ha Pet kuxa hittup 'ohnāg, hu' potaha'.

## 15

### *Yeyox xip Pinat keppah*

<sup>1</sup> Māyōn xupep 'ihā yāytunū'nāhā 'āmānex xexka xop, xix Yoneo xop yōg xexka xop, xix tik te hāmyūmmūg xop, tu hām'āktux tik pa te hāmyūmmūg xop mūtik.

Ha ta xonat xop te Yeyox hīy, tu ta' mōgāhā Pinat hah, tu mōktu Pinat pu Yeyox hōm.

<sup>2</sup> Ha Pinat te Yeyox pu hām'āktux, hu:

—'Ok xate Yoneo xop xat? Kaxĩy.

Ha Yeyox te:

—Hamũn. Xate hãm'ãktux. Kaxĩy.

<sup>3</sup> Ha 'ãmãnex xexka xop te Yeyox 'ãktux kummuk punethok.

<sup>4</sup> Ha Pinat te xe yĩykopit, hu:

—'Ok xate hãm'ãktux hã yãnãn 'ohnãg? 'Äpu 'ũxupax, nõm xop te hãm'ãktux 'ãkummuk! Kaxĩy.

<sup>5</sup> Pa Yeyox te xe hãm'ãktux yãnãn 'ohnãg, yĩy Pinat kuxa kopa' yēy.

*Tikmũ'ũn te hãm'ãktux Yeyox 'ũkummuk*

<sup>6</sup> 'Ämuk xexka 'ãxet'ax Nõa' Yēn xip, ha tikmũ'ũn te ta tu' xak, yĩy ta Pinat te tik xut kanet ka'ok kopah, pu mōg. Yã hãmyãxatamuk xohix hã kaxĩy.

<sup>7</sup> Ha ta' xip tihik 'ãxet'ax Mahamax kanet ka'ok kopa yã xape xop mütik. Yã hõmã tikmũ'ũn te gohet yōg xop mütik yãy kix, ha Mahamax te tikmũ'ũn kix, ha' xakix.

<sup>8</sup> Ha ta' nũn nõmhã tikmũ'ũn, nũy ta tu' xak, puyĩy tik xut kanet ka'ok kopah, pu mōg, Yã hãmyãxatamuk nõy xohix putuk.

<sup>9</sup> Ha Pinat te:

—'Ok 'ãxop tep-tup, 'ũyĩy xut, pu mōg Yoneo xop yōg xat'ax Yeyox? Kaxĩy.

<sup>10</sup> Yã Pinat te' yũmmũg 'ãmãnex xexka xop Yeyox hã yĩpkumĩy, hu Yeyox nũnnãhã Pinat hah,

<sup>11</sup> tu hãm'ãktux hã tikmũ'ũn gãyãhã', puyĩy ta tu' xak, puyĩy Pinat Mahamax xut pu mōg, 'ap Yeyox'ah,

<sup>12</sup> ha Pinat te:

—'Äxop te putep-tup, 'ũ mĩy tik mütik? Yã 'ãxop te nõm xãnãhã nõm te Yoneo xop xat. Kaxĩy.

13 Ha tikmũ'ũn te:

—'Āpu mĩpkup nix yĩmũp-tex pipkup hã. Kaxĩy.

14 Ha Pinat te:

—Teptu, putep kummuk mĩy? Kaxĩy.

Ha tikmũ'ũn te hãm'ãktux ka'ok nõy nã' mōg, hu:

—'Āpu mĩpkupnix yĩmũp-tex! 'Āpu mĩpkupnix yĩmũp-tex! Kaxĩy.

15 Ha Pinat tep-tup, nõy tikmũ'ũn kuxa hit-tupmã', hu Mahamax xut, pu mōg, tu hãpxip ĩhã xat, puyĩy xonat Yeyox kix xikot hã, tu xonat xop pu Yeyox hõm, pup-tex.

### *Xonat te Yeyox kute'ex kummuk*

16 Ha ta' mōg xonat xop, tu Yeyox mōgãhã gohenanok pet tu', tu mōktu' mōxaha', ha xonat xohix te yãy tu nũ'nãhã'.

17 Hãpxip ĩhã xonat te Yeyox pu mō xax tat, yã topixxax tox 'ãta', puyĩy xexka xop putuk, tu Yeyox putox yĩmũ' xix kuxxax, puyĩy xexka xop putuk, yã mĩmyãmtoxmãg hã' mĩy.

18 Xonat te:

—'Āmax xe'ẽgnãg! Xate Yoneo xop xat! Kaxĩy.

19 Xonat te Yeyox putox kix mĩm xahix hã, tu mōg yĩyhep yõn, tu kopaxux tu' pip Yeyox keppah, yã' xexka xop keppa putuk, yã' xexka xop 'ãpak putuk,

20 tu Yeyox kute'ex kummuk kux, tu topixxax tox 'ãta xut, tu mō xax tat, yã Yeyox yōg, tu Yeyox mōgãhã hãptopah, nõy mĩpkupnix yĩmũp-tex.

### *Yeyox putex mĩpkupnix yĩmũ'*

21 Tu ta' mōg, tu putat hã' mōg, pa' xip tihik 'ãxet'ax Xĩmãm, yã hãm panip tu' nũn, tu kōmẽn tu' mōg, yã kōmẽn Xĩnẽn yōg tihik, yã 'Anexãn mũktak

xix Hop mūktak. Ha ta' xat xonat te, pu Xīmām mīpkupnix tat, ha' taha',

<sup>22</sup> ha xonat xop te Yeyox mōgāhā hām tu 'āxet'ax Gok, yā tikmū'ūn yīy'ax hā: “Hām tu' xip putox kup.” Kaxīy. Tu' mōg tu mōktu' mōxaha',

<sup>23</sup> ha xonat te Yeyox pu' hōm xupyāg xix hehmēn, yā xupyāg hā' kanop hehmēn, pa yā' xo'op'ah,

<sup>24</sup> ha xonat te Yeyox xix mīpkupnix yīmū' pipkup hā, tu mō' xap yōn, nūy xonat puxet pu Yeyox xax hōm, ha ta' nōy pu' nōy hōm hā kaxīy.

<sup>25</sup> Yā māyōn te pexkox puka' yūm 'ihā mīpkupnix yīmū' xup Yeyox pipkup hā.

<sup>26</sup> Ha ta 'ōm xip, tu' kax'āmi, hu: “Tik te Yoneo xop xat”. Kaxīy. Tu nōm xix mīpkupnix yīmū'.

<sup>27</sup> Ha xonat xop te mīpkupnix yīmū xupxet tix kix pipkup hā, yāp-xet xup Yeyox yīm xe'e tu', ha ta' nōy xup 'ūyīm xax tu'.

<sup>28</sup> Hā kāxīy Topa yōg tappetxax te hām 'āktux xe'e'. Yā Topa yōg tappetxax te, “Yā' xip 'ūkummuk xop mūtik.”

<sup>29</sup> Ha ta' nūn tikmū'ūn, tu nūktu Yeyox mānōg, tup-tox mahap, tu:

—'Ūgāynām! Tute hām'āktux Topa pet xexka koxyōy yūmmūg, tu xe' mīy yūmmūg 'āmnīy tikoyuk hā'

<sup>30</sup> Pu yā yīyox mīpkupnix tu', nūy xok hok. Kaxīy.

<sup>31</sup> Ha ta Yeyox mānōg kama 'āmānex xexka xop te' xix tik te hāmyūmmūg xop te', tu:

—Tute tikmū'ūn hīnnā yūmmūg, pa yāy hīnnā yūmmūg 'ohnāg!

<sup>32</sup> Topa te 'āyāykutnāhā, ha xate Yoneo xop xat. 'Āpu mīpkupnix tu yīyxox. 'Ūgmū'āte' pēnāp-tup, huk mūg kuxa mām putup 'ākopah! Kaxīy.

Ha ta xupxet te Yeyox kute'ex kummuk kamah.

### *Yeyox xok*

<sup>33</sup> Māyōn te yāykote' yūm, pa hām xohix tu hāpkoxtap, tu mōktu māyōn he'.

<sup>34</sup> Ha māyōn he 'ihā Yeyox te hām'āktux ka'ok, hu: —“Enix, 'Enix, nēmā xamatān?” Kaxīy. Yā tikmū'ūn yīy'ax hā: “Yōgnū Topa, yōgnū Topa, tep-tuk nīm?” Kaxīy.

<sup>35</sup> Ha tikmū'ūn te' xupak, tu:

—'Ūxupax! Tute 'Enit xānāhā! Kaxīy.

<sup>36</sup> Ha 'ōm xip, tu ta' mōg, tu tohok hā xupyāg kummuk xup, tu mīm hā' xuhmīy, tu' nūnnāhā', tu Yeyox pu' hōm, pu xo'op. Tute:

—'Āpu yūmū'āte pēnā'. 'Ok 'Enit nūn, nūy mīpkupnix tu' xut? Kaxīy.

<sup>37</sup> Ha Yeyox te hām'āktux ka'ok, tu' xok xe'e'.

<sup>38</sup> Ha ta Topa pet xexka yōg topixxax mōhāmñnyīn'ax pot 'ūpepex mōktu' kakak.

<sup>39</sup> Ha ta' xip xonat yōg kapitām Yeyox keppah, tu Yeyox te hām'āktux ka'ok 'āpak, tu Yeyox xok pēnāhā', tu:

—Hamūn, tihik nūhū' yā Topak-tok! Kaxīy.

<sup>40</sup> Ha ta' pip 'ūhūn hāptox miāx tu', tu' pēnāhā', yā 'ūn xop kopa' pip Mānix Mānanēn, xix Xanomē', xix Manix, yā Yoye mūktut xix Tiak mūktut, yā Tiak yā tuktup.

<sup>41</sup> Yā hōmā 'ūn te Yeyox mūtik mōg pax tu hāpxexka Ganinet tu', tu Yeyox pu hāpxop max mīy.

Ha ta' pip kama 'ūn nōy xohix. Yā' nūn Yeyox mūtik kōmēn Yenoyanēn tu'.

*Yeyox yīn xix mīkaxxap kox kopah*

<sup>42-43</sup> Āmāxak 'īhā' nūn Yoye', yā kōmēn 'Animātex yōg tihik, yā' xexkah, tu tik pa te hāmyūmmūg xop kopa' xip. Yā tute' hip Topa te yāy yōg tikmū' ūn xat, ha' yīpkox pip. Yā xexta pet 'āmāxak 'īhā Yoneo xop te hāmmāxnāhā nit xap pu', yīy ta Yoye kuxanōg 'ohnāg, hu ta' mōg Pīnat hah, nūy ta tu Yeyox xokxax xax.

<sup>44</sup> Pīnat te' xupak Yeyox xok xe'e nōmhā, tu' yēy, yā' xok mō'ka'ok. Pīnat te' xānāhā Hōm yōg xonat xop yōg xat'ax, yīy ta' nūn, tu nūktu' xupep. Ha Pīnat te:

—'Ok xok tāmnāg Yeyox? Kaxīy.

<sup>45</sup> Ha:

—Hamūn. Kaxīy.

Ha Pīnat te Yoye pu xokxax hōm.

<sup>46</sup> Ha ta' mōg Yoye, tu topixxax paha', tu ta' mōg, tu mīpkupnix tu Yeyox yīn putxok, tu topixxax hā' kīy, tu' nūn, tu nūktu mīkaxxap kox kopa' xix, tu mīkaxxap xexka yōkānāmāhā hāmyīkox kopah,

<sup>47</sup> ha Mānix Mānanēn te' pēnāhā xix Mānix te', yā Yoye mūktut. Yā Yeyox yīn pēnāhā' xix mīkaxxap kox.

## 16

*Yeyox te putpu' hix*

<sup>1</sup> Nit xap 'āmnīy tuknōg nōg 'īhā' mōg Mānix Mānanēn, xix Xanomē', xix Mānix, yā Tiak mūktut, tu hep hāynāg max paha', nūy Yeyox yīn muk.

<sup>2</sup> Yenomīy māyōn xupep 'īhā' mōg mīkaxxap kox tu',

<sup>3</sup> tu putat kopa yāy mūtik hām'āktux, hu:

—'Ū'ūm tek mū'ā mīkaxxap xexka yōkânāmāp-tup, nūy xut hāmyīkox tu'? Kaxīy.

<sup>4</sup> Yā' xexkanām mīkaxxap, yīy nōm 'āktux. Pa' pēnāhā', pa' xip'ah hāmyīkox tu'. Tep-te' yōkânāmāhā'?

<sup>5</sup> 'Ūn te mīkaxxap kox hā' mōxaha', pa' yūm tihik, tu yōg topixxax tox ponnok, yā' yūm 'ūn yīm xe'e tu', yīy 'ūn te' yīpkutuk xexkah.

<sup>6</sup> Pa tik te:

—'Ākuxanōg hok! 'Āte' yūmmūg, 'āxop te' xak kōmēn Nāyane yōg Yeyox. 'Ap xip'ah nūnteh. Yā putpu' hi'. Pēnā 'ūyōg xip'ax nūnteh.

<sup>7</sup> Mōg, nūy Pet pu hām'āktux xix Yeyox yōg tik nōy pu'. 'Āpu hām'āktux, hu: “Yeyox te 'ākeppa mōg hāpxexka Ganinet tu'. 'Āxop te' pēnāp-tup 'ōnteh. Yā Yeyox te xa nōm 'āktux hōmā.” Kaxīy.

<sup>8</sup> Ha ta' mōg 'ūhūn, tu' mōg mō'ka'ok, yā' yīpkutuk, yā' kuxanōg, hu' yēy, yā hām'āktux 'ohnāg.

### *Yeyox te Mānix Mānanēn pu yāy mūg*

<sup>9</sup> Hāptup yenomīy 'ihā putpu' hix Yeyox, tu Mānix Mānanēn pu yāy mūg hāmāxap. Yā hōmā Yeyox te' mōy yāmīy kummuk te' 7 Mānix Mānanēn kopah,

<sup>10</sup> ha ta' mōg, pa' pip Yeyox mūtik mōg xop, tu' kuxa hittup 'ohnāg, tu' potaha', ha Mānix Mānanēn te:

—'Ūputpu' hix Yeyox. Kaxīy.

<sup>11</sup> Ha' xupak, yā putpu' hi', tu tikmū'ūn pu yāy mūg, pa' kuxa mām 'ohnāg hām'āktux kopah.

### *Yeyox te yāy yōg tik tix pu yāy mūg*



<sup>12</sup> Hāpxip 'lhā Yeyox te yāy yōg tik tix pu yāy mūg. Yā tik mōg hām panip tu', tu Yeyox pēnāhā',

<sup>13</sup> tu putpu' nūn, tu nūktu Yeyox yōg tik nōy pu nōm 'āktux, pa' kuxa mām 'ohnāg hām'āktux kopah.

*Yeyox te yāy yōg tik te 11 xop pu yāy mūg*

<sup>14</sup> Ha ta' mōg Yeyox, tu yāy yōg tik te 11 xop pu yāy mūg. Yā' xit tihik, ha' nūn Yeyox, tu tik pu yāy mūg, tu:

—Teptu 'ākuxa mām 'ohnāg. Tikmū'ūn te: “'Ūgmū'āte' pēnāhā Yeyox. Yā putpu' hi'”. Kaxīy. Pa 'ākuxa mām 'ohnāg hām'āktux kopah. Yā' kummuk. Kaxīy.

<sup>15</sup> Tu xe:

—'Āpu mōg hāpxexka xohix xexka tu', nūy Topa yōg hām'āpak max'ax 'āktux tikmū'ūn xohix xexka pu'.

<sup>16</sup> Tikmū'ūn 'ūm kuxa yūm ka'ok 'ūgkopah, hap-tox pix, puxix Topa kuxa kummuk xit, nūy kuxa max mō'tat, 'ūyānān tu'.

<sup>17</sup> Topa te' kuxa mām ka'ok xop ka'ogāp-tup, puyīy hāpxopmā ka'ok xe'ēgnāg. Yā yāmīy kummuk mōy putup, tu' yīy'ax tup punethok hā' xuktux putup.

<sup>18</sup> Kāyā gāy tep-top, puxix xūy 'ohnāg. Hep kummuk xo'op nōm te tikmū'ūn kix, puxix xūy 'ohnāg, tu pakut xop yīmū yāy yīm xex, puxix hittup.

*Yeyox mōg pexkox tu'*

<sup>19</sup> Yūmūg xuxyā Yeyox te hām'āktux kux, ha' nōy te' mōgāhā pepix pexkox tu', ha' yūm Topa yīm xe'e tu'.

20 Ha ta' mōg Yeyox yōg tik xop, tu tikmũ'ũn pu Topa yōg hām'ãpak max'ax 'ãktux hãpxexka xohix tu'. Ha yũmamũg xuxyã te yōg hãm'ãktux ka'ogãhã', yã nōm mō'nĩgnãm, puyĩy hãpxopmã ka'ok xe'ẽgnãg. Hã kaxĩy tikmũ'ũn te' yũmmũg 'ũxe'e yōg hãm'ãpak max'ax.

Tu ta tu' kux.

**Topa Yōg Tappet**  
**New Testament in Maxakalí (BR:mbl:Maxakalí)**

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
a212b59e-62d7-5a38-9773-b0ce1d5b248b